

௫.

# நாபீள் உள்ளேயு விநாள் கஸின் ஆனந்தம் கீதுன்

ஒத்திது:

கஸின் ஆனந்தம்

பராத் கள்ளியவ்னார்:

ஸரஸ்வதி புஸ்தக பண்டு

55. ஸௌராஷ்டிரத் தெரு.

இராமநாதபுரம் - 623 501

பைல நிம்பிளி:

ஏப்ரல்—1990

ஸௌராஸ்ட்ர விஜயாப்தம்: 678

பாத்தியம: ஒத்தித்துணுகஸ்

நிம்பிளிவான்:

நாகேத்தின் அச்சகம்

217-A, தெற்கு மாரட்டு வீதி,

மதுரை-625 001.

# நிம்பினி வாசு

1-5-1976 ஒத்திதிது ஸ்ரீ கஸின்ஆனந்தம் னு அபுல் ஸெங்காடி ஒகெ காம்ஸாலாம் காம் கரெ காலு ராம்நாத்தரம் ஸௌராஷ்ட்ருன் ம:த்:திமு, 1-5-1976வ தின்னும், ஸமூஹ மஹா ஸபா மிளெ கும்பும், ஸ்ரீகஸின்ஆனந்தம்-னு பாஷாணன் கரெ விஷேஸுன், உத்வேகு ஹொயெ வத்தான் ஹாவி, “ஸௌராஷ்ட்ர ஜவ்ணன் ஸ்தாபனெ” மெனன் ஒகெ ஸ்தாபனெ ரூப் ஹோஸ்தக் காரணெ ஹொயெஸ். தெல்லெ ஸ்தாபனும், ஒத்திதிதுன் ஸௌராடி. மீ மெளி ஸெங்கா: காமுன் கரன் நிமிளெஸ். தெக பல்லொ அம்ரெ தொணு ஸமக ஹோர் செட்னி, மாய் பாஷொ ஹொவடத்தக் ஹொயெ, கார்ய கரன் ஹொயெஸ்.

எகர் முதுல்லாமுஸ், ஸ்ரீ கஸின்ஆனந்தம்-னு, ஸௌராஷ்ட்ரம் கவிதான் ஜுகுயொ லிக்:கி, தே ஸமூஹ பத்திரிக்கம் நிம்பினி ஹொயி, அவ்லேத் ஹொதெஸ். கெயெ பந்தர் ஓர்ஸுகு வேனுஸ் தெங்க கார்ய கவிதொ லிக்:கித் தெமாகின், துஸ்ர ஜுகும் லிக்:கி ப்ராட் அவெ சொக்கட் கெனின், விஷயுன், மாய் பாஷாம் தர்ஜமா கரிகின்கின், லிஸ்யெ மாய் பாஷொ வத்தான் அப்லான் லிக்:கின் கவிதாமு தாம் தீகின், பெளி விஷேஸ்கன் ஹொயி அவ்லேத் ஹொதெஸ்.

ஏ தொணுக லிலேத் அவெ, “ஸர்ஸவதி புஸ்தக பண்டு” நிர்வாஹின் ஹொயெ மொரெ லிங்கதின், ஸ்ரீ N. N. மாதவன், ஸ்ரீ P. M. கிருஷ்ணமாச்சாரி-ன் ஸெங்கொ மிளி, தெங்க ஆலோசனெ ஸெரொ, எகர் லெந்தும் கஸின்ஆனந்தம் லிக்:கெ கவிதான் ஒண்டேஸ்கரி, பொதிக ப்ராட் அனத்தக் மெல்லிய வேளு பெளி ஸொந்தோஷ் பொந்த்யாஸ்.

ஹாலிம், கவிதான் ஸொலாதி கரத்த காம் ஹோர் கள்ளி, ஹிந்தா தின்னும், ஒகெ கவிதொ பொதிட ப்ராட் அனன் ஹொயெஸ். ஏ பொதிரு, “கஸின்ஆனந்தம் கீதுன்” மெனி நாவுக்:ரான். கவிதாம் ஸான் சொக்கட் விஷயுன், ஸமூஹ ஜனுல்னு ஜொவன், லோத்தக் மொன்னும் பொடத்தகின், ஜனுல்னு தெள்சத்தக், ஏ ஸொக, அங்குன் ஜுகு பொதின் ஸ்ரீ கஸின்ஆனந்தம்-னு லிக்:கித்தக் அமி வெடேஸ்புருக் வந்தில்ஜே.

நமஸ்கார்.

தின்னு:

3-4-1990

ஏதானுசு

T. R. ஆத்மாராவ்-மதுரை

# கலிணி வாசு

கவிதொ ஹால் பாஷாகீ? பாஷொ ஹால் கவிதொ?  
ஏ புஸீனிக் ஜவாப் ஸங்கன் முஸுனாத்தக் தூருக் லிக்கயி  
ஸேத்தேயேஸ் கவிதொ மெனுவாய்.

புலோசுர் ஸேத்தெ அஸ்கி பாஷான்கீ அஸ்கொ பாஷா னாஸ்  
கோன் பாஷொ ஹொயெத் மென்னி தெகொ ஸேத்தெ விஸேஷ்  
குண்ணு தானுக், ஸாஹித்யமுன் கெரத்தக் வாட் தேய். ஒண்டெ  
பாஷாம் மொட்ட ஸாஹித்யமுன் கொன்னி நீ:மெனெத், தே  
பாஷாக் அமி சூக் ஸங்கன் முஸுனா. தே பாஷாக் உபயோக்  
கெல்லிரானி மெனீஸ் கள்ளுனெ.

ஒண்டெ பாஷாகெ பொஸிந்தினி களடத்தக் கவிதொ  
ஹாலீஸ் முஸரஸ். தெஸ்ஸு வத்தாம் இவர் கெரி ஸங்கன்  
ஸம்ச்சாரு. ஒண்டேஸ் வத்தாம் எரிங்கார்கள் ஸங்கினி  
பொண்ணெ. தெல்லேஸ் கவிதொ; தெல்லேஸ் அஸ்கினுக்  
மொன்னும் பொடய். தெக ஹாலீஸ் பாஷொ விஸுஞ்சய்.

அம்ரெ ஸௌராஷ்ட்ர பாஷாம்கீ, ஒண்டியான் ஸாஹித்யமுன்  
ஜெனடி தொவ்ராஸ். ஜெனவாச்சர் ஸே அமி ஹொவ்டிரானி.  
தெகஹால் அம்ரெ பாஷொ வஸுனெ பராட் களாரனி. ஹிந்தா  
கலமுக் தயெ தானுக் தொவ்வொ ஸாஹித்யமுன் அம்ரெ பாஷாம்  
உஜண்ணெ. ஏ கெடிமு, ததான் கஸின்ஆனந்தம் லிக்கெ  
தெவ்ட கவிதானு புஸ்தவ்கன் பராட் ஸொடத்தக் ஸொம்மர்  
அவெ ரவ்நாத்புரம் ஸரஸ்வதி புஸ்தக பண்டு நிர்வாகினுக் அமி  
அஸ்கின் விஸ்வாஸ் களடி ஹொனெ. அங்கொ விஸ்ரயி ஜியெ  
அம்ரெ பாஷா வத்தானஸ்கி ஹவ்டன் கெரி தேத்தெமொ  
ஆனந்தம் ததான் ஹிந்தொ ஸொம்மர் ஹிப்பிராஸ். ஹவ்டன்  
ஜியெ வத்தான் களண்ணெ மெனத்தக் குர்ச்சீஸ் தெனு  
லிக்கராத்தெ மென்ராஸ். வத்தான் களடத்தகு கவிதொ தெங்கொ  
ஒண்டெ ஐதுகன் ஸே. ஏ புஸ்தவமு, தெனு லிக்கெ கீதுன்  
அஜுனுகீத், தேவுகீத், பிரேமு கீத், நு:ரு கீத், விங்கரு கீத்,  
தத்துவ கீத், மாய்பாஷா கீத், ஸமஸ்துகீத் மெனி தெவ்ட வடான்  
கெரி தீராஸ்.

பெட்கினு அந்துஸ் கவ்னாத்தெ கவினாஸ் ஜுண்ணு  
மெனுவாய், அம்ரெ பாஷாமு எரிங்கார் கவத்தக் புஸுனெயீ?

‘அவ்வெவொ அந்துஸ் நரெனா குர்த்து  
அவ்வெ ஸீதுவீனு காமபாகு அர்த்து  
கோஸெ லீம்புவனி குர்த்து  
கோஸு ரியெதி லாம்க -தெர்த்து’

இஸனி அந்துஸ் கவ்னிம் மெள்ளி, ‘ஸீதுவீன்’ மெனத்தெ  
அம்ரெ ஸௌராஷ்ட்ர திருக்குறள் களடத்தக் ஹவ்டன் ஜவள்ளிரானி  
பெட்கினு மொன்னு ஜுக்கு லோத்கன் ராய், அமி கணைலன்  
முஸுனா மெனன் ஸமச்சாரு,

“எங்குட் தெங்குட் தமரிய நெளி ஸொகனு  
எங்க ஹட்வனு உஸுளயி தெக ஸொகனு  
ஸுந்துரு நின்னெ களள்ளிய புத்திமானு  
ஸுந்தரி மொன்னு நின்னெ ஜனன்முஸனி வேனு’  
மெனி ஸிங்கார்கன் ஸங்கிராஸ்.

நன்ன ஹொவ்டான் களத்தெமொ மெள்ளி,  
‘நெத்தி பனிம் தமிழின் களெங்கோஹா  
நெத்தி வளும் பாஷொ லிக்கெங்கோஹா  
ஜாடு லானும் ஸேத்தேட் ஜயெங்கோஹா  
ஜாடும் அம்ரெ பாஷொ கிக்கெங்கோஹா’

மெனிகின் பாஷாபக்தி களடராஸ். பாரதிதாசன் லிக்கெ ‘குடும்ப  
விளக்கு’ம் அவரெ தல்லொ பைலெ, நிஞ்ஜன் ஜாத்தவேளொ  
மெள்ளி, ஸமூஹமுகு குர்ச்சி. பாஷாக் குர்ச்சி ஹவ்டிஸீ வத்தொ  
கெல்லன் மெனா. தெக ஸொகன் ஏ ப்ரேமுகீத் பாஷாபிமான்  
ஸெங்கொ ஸே.

ஹிந்தா கலம்மு, ஜுக்கு பில்லலுக் ஜெனிகின் தெங்கொ  
ஹொவ்டி மொட்டப்பன் கெரத்தெ, முஸுனாத்தக் ஸே.தெகஹால்  
லெக்கதானுக் ஜெல்லியெத், ஸெர்க்கதானுக் அமி ரவ்வாய்.  
ஏ ஸமச்சாரு பெளி சொக்கட்கன் பைல் தல்லாக் ஸீ கவரெ  
ஸொகன் ஸங்கிராஸ்.

கன்னுங்கொ ஆஸெ அய்யான்  
காளு மிஞ்செத் வேஸு அய்யான்  
சார் நுரு ஜெந்திரியொ ஜவொ தெங்குடும்  
ஜன்னுத்தக் ஜென்லெத் ரியெத் தாமு நீ ஏடும்.

அம்ரெ ஸமூஹம்மு ஜுகுதெனு மகொ வினத்தெனுகன் ஸே.  
தெனு வினரெ பொட்டான் ஜெனுல்லு கெடெஸ்தீனா அங்கொ

ஜிவ்னம் சலய்? முல்லொ... அமி வினெ பொட்டொ அமீஸ்  
பில்லராஸ்கீ? மில் பொட்டானூஸ்தா கடி பில்லராஸ். இஸொ  
ரியெத் லம்புரம் அமி ஜிவத்தெ கோனக்?

பில்லாகு பெய்லுகு காமுனு கடயி  
பில்லஸ்தகு மில்லு பொட்டொ கடயி  
ஹேது நீஸ்தெ எல்லெ காம்  
ஹாது தேய்ஹா அம்ரெ காம்

எல்தெ கீது அம்ரெ ஸமுஹ லங்காஸ் திகுச்சர் ஹெடி  
தெக்கடரெஸ்.

அம்ரெ பாஷொ அஸ்கினு செவ்துனெ, லிக்குனெ மெனி  
'ஹுகோ' மெனன் கீதும் ஸங்கராஸ். அஸ்கினு அம்ரெ லிபிம்  
லிக்கி செவ்தத்தெ அத்தாக் முஸுனாஜியெத்மெள்ளி பிரயத்தன்  
கள்ளியெத் லம்புரம் ஸெர்க்காக் அவய்.

மொரெ ஹாலி முஸுனாமெனி  
மொகொ மெள்ளி களாயி  
ரியெதி மெள்ளொ

ஸங்கன் அவெயொ ஸங்குஸ்தரியொ—ஹீதுரு  
ஸங்கமுன் ஸமுஹமுன் தெள்சட்டுனெ

ஸௌ பாஷொ இகட்டுனெ  
அவ்ரெ பாரது செவ்ருஸ்துனெ

மெனி ர:த்தொ வத்தொ கீக்கன் கவெ ஆனந்தம் ததான்.

முக்குன் கலெத் கேருக் ஸிங்கார்—ஸௌராஷ்டர்  
பொக்குன் இகெத் ஜிவ்னம் அலங்கார்

மெனிகின் அமி அம்ரெ புஸ்தவுன் செவ்தி கனாலியதீஸ்  
ஜிவ்னமுக் அலங்கார் ஹோய் மெனராஸ். தே ந:த்தகு,  
மலையாள லிபி ஹனடெ எழுத்தச்சன். தமிழ் பாஷாம் வசனம்  
முல்லொ முல்லொகன் லிக்கி, லிபின் மெள்ளி ஹதொ கெரி தியெ  
கான்ஸ்டாண்டி நோபின் ஜோஸப் பெஸ்கி மெனன் வீரமாமுனிவர்,  
எங்க ஸோரு காமுன்கெரி அம்ரெ பாஷா லிபி ஹனடாத்தெனு  
தொப்பென் ராமராய்னூஸ்! தெங்ககு அமி மொட்ட ஸ்தானும்  
தொளி, தெனு ஹவ்ஹெதானுக் பாஷொ ஹொவ்ஹெத் தெ அம்ரெ  
அஸ்கினு காதவ்யம் [ஹோய். ஏ ஸமச்சார் மெனி, கீதும்  
தெக்கடரெஸ்.



அம் ஹவ்டெ தானுக் அஸ்கீஸ் சலத்தெ நீ: ஒண்டெ  
காம் சல்தகென்னெ மெனி மொன்னு ஸேத்தெகொ ஜே:ன்,  
தே காம் முஸடத்தெ ஹன்னவ்தார் ரா:னா. ஹன்னவ் காஸுன்  
ஜுக்கு ஸேத்தெகொ, சொக்கட் காமுனாஸ் தெக்கானா. ஹன்னவு,  
மொன்னு திய்யெ செரெதீ....

ஸேவொ கரஸ்தெ மொன்னு ரி:யெதீ ஹன்னவு ரா:ஸ்தெ நீ:  
ஹன்னவு ஹாத்தோரு ரி:யெதீ ஸேவொ கரஸ்தெ மொன்னு  
ராஸ்:தெ நீ:

மொன்னு ஹன்னவு திய்யொ ரி:யெதீ  
குண்ணு ஹொயெ கும்பு அப்பஸ்தெ நீ:

மெனிகின் சொக்கட் காமுன் ஜுக்குகன் சல்தெ காரனெ  
சொக்கட்கன் ஸங்கிராஸ்.

அம்ரெ ஸமுஹ மென்கியான் அஸ்கின், ஏ புஸ்தவ் கடி  
செவ்தி ஆனந்தம் ததான் லிக்கிரெ ஸொகன், தெங்க ஜிவ்னம்  
அலங்கார் கெல்லுனெ மெனி மெல்லரெஸி. ஆனந்தம் ததான்,  
தெங்க ஹால் முஸெகெத்தி பூலுன்கன் ஸேத்தே ஏ கவி அஸ்கி  
பந்தி, புஸ்தவ் மெனன் ஹாரம்கன் அம்ரெ ஸௌராஷ்ட்ர  
மாயிக் கல்ராஸ். அவன் காலும் ஸொன்னெ, ரெத்தன் இஸனி  
மோல் தெக்கன் முஸுனாத்தெ ஹாரமுன் மெனி தெனு பந்தி,  
பாஷாமாயிக் கல்லெ மெனி மெல்லரெஸி.

ஏதானாகு,

திருபுவனம் M. S. ரமணி



# முக<sup>3</sup>வாகு

ஸௌராஷ்ட்ருனுக் நமஸ்கார். மொக மாபி பா<sup>4</sup>ஷொ  
ஹோர் ஸேஸ்தெ அபி<sup>4</sup>மான் ஹால், ஏ ந:ன்ன கீ<sup>3</sup>து பொதி  
ருப் ஹொயெஸ். சொக்கட் ஸே மெனெத் துஸ்ர தெங்க  
ஜொவள் ஸங்கொ. சூக் ஸே மெனெத் மொர் ஜொவள் ஸங்கொ.  
ஏ பொதும் க<sup>3</sup>ல்னிவாகு க<sup>3</sup>லெ திருபுவனம் பை<sup>4</sup>

M. S. ரமணி B. A., கின், ஏ பொதி ப<sup>4</sup>ரூட் அனத்தக் ஜுகு  
ப்ரயத்தன் கரெ ராம்நாத்புரம், ஸரஸ்வதி புஸ்தக பண்டு  
நிர்வாஹின் ஸ்ரீமான் T. R. ஆத்மாராவ் ஸ்ரீமான் N. N. மாதவன்,  
ஸ்ரீமான் P. M. கிருஷ்ணமாச்சாரி-னுகுகின் ஏ பொதி நிம்பிஸ்தக்  
பெ<sup>4</sup>ளி ஸ்ரத்<sup>3</sup>த<sup>3</sup>த<sup>3</sup>ள்ளி க<sup>3</sup>ம்சி காம் கரெ “ஸுரித்” ஒத்<sup>3</sup>தி<sup>3</sup>துன்  
ஸ்ரீமான் V. K. நீலாராவ்-கின் “மூஜாதீபம்” ஒத்<sup>3</sup>தி<sup>3</sup>தி ஸ்ரீமதி  
ஜனபாய் கிருஷ்ணமூர்த்தி-னுகுகின் அங்கு<sup>3</sup>ன் ஏ பொதி அந்தூஸ்க  
நிம்பி<sup>3</sup> தியெ நாகேந்திரன் பிரிண்டர்ஸ் ஸ்ரீமான்  
N. ஸுப்புராமன்-னுகு மொரெ மொன் பொ<sup>4</sup>ரெ விஸ்வாஸ்  
களள்ளரேஸ்.

ர:னி: 7, ஜே. ஜே. ரோடு  
சி. எம். ஆர். ரோடு  
மதுரை-625 009

ஏதா<sup>4</sup>னுகு  
துமர் ப்ராமொ ஹொயெ  
கஸின் ஆனந்தம்





## வினாயி கீத்

மாயி பரபு மொகொ தூஸ் வினாயி—தொரெ  
பாயிர் பொடிமீ நமெளி வினாயி  
மாயி பாஷாம் மீ கீத் லிக்கத்தக்—மொகொ  
ஆரி தே கொப்பிம் வினாயி —(மாயி)

மாயி பாபுக் சுட்டு பிரெ வினாயி—ஆஸெக  
மயெ பொள்ளொ கள்ளியெ வினாயி  
மாயி ஸொகன் பெட்டி அப்பெதீஸ்—தொகொ  
ஹோயி ஹொராட் மெனெ வினாயி (—மாயி)

மஹா தேவுக் பெட்டொ தூ வினாயி—ஸ்ரீ  
மஹா பா'ரது லிக்கெ வினாயி  
மது'ர கீத் மீ லிக்கத்தக்—அவி  
மெது'டும் ஹிப்பி'ரியெ வினாயி (மாயி)



## நமஸ்காரு

ஸோ எரிரஸ் ஸேஸ்தெ தே<sup>3</sup>வுக் நமஸ்காரு

ஸோ ண்டிபதிபை<sup>4</sup>கு நமஸ்காரு

(ஸோ)

பொள்ளொ பஜெ மெனி

பு<sup>4</sup>லோக் சுட்டு பீ<sup>3</sup>ரெ

பொளனி தே<sup>3</sup>வுகு நமஸ்காரு

(ஸோ)

ஓம் மெனஸ்தெ அட்சரும் ஹிப்<sup>3</sup>பீ<sup>3</sup>ரெஸ் தெனெ

உமாபதிகு உபதே<sup>3</sup>ஸ் கெரஸ் தெனெ

அருணகிரிகு அமீர்த்து தமிழ் தீ<sup>3</sup>யஸ் தெனெ

அம்ர ஜிவ்னமு ஜீவாமீர்த்து ஹொயெஸ் தெனெ

(ஸோ)

கொரி தபஸ் கெரெ

கொப்பான் ஸமியாருகு

கௌ<sup>2</sup>னஸ் போகும் வாட் ஸங்கெ<sup>3</sup>

கௌ<sup>3</sup>ரி பெ<sup>3</sup>டாரு நமஸ்காரு

(ஸோ)



## ஆவி தீர்

பொ<sup>3</sup>ட்கொ:- ஸௌரதே<sup>3</sup>வி தூ அவ்ரெதே<sup>3</sup>வி—பொங்க<sup>3</sup>ல்  
ஹுப்<sup>3</sup>பெ<sup>3</sup> ஸொகன் ஜிவ்னம் ஹுப்<sup>3</sup>பின் ஆவி

பெ<sup>3</sup>ட்கி:- ஸௌரதே<sup>3</sup>வி தூ அவ்ரெ தே<sup>3</sup>வி—பொங்க<sup>3</sup>ல்  
ஹுப்<sup>3</sup>பெ<sup>3</sup> ஸொகன் ஜிவ்னம் ஹுப்<sup>3</sup>பின் ஆவி

கு<sup>3</sup>ம்பு:- ஸௌரதே<sup>3</sup>வி தூ அவ்ரெ தே<sup>3</sup>வி | பொங்க<sup>3</sup>ல்  
ஹுப்<sup>3</sup>பெ<sup>3</sup> ஸொகன் ஜிவ்னம் ஹுப்<sup>3</sup>பின் ஆவி

பெ<sup>3</sup>ட்கொ:- பாடு பொடி<sup>3</sup> காழு கெரிகின்—ஜிவஸ்தக்  
வாடு நீஸ்தக் ஹோரேஸி  
வேளு மெனி மெல்லஸ்தகி—தொரெ  
கா<sup>3</sup>ளு மெனி ஜல்லஸ்தகி

கு<sup>3</sup>ம்பு:- வேளு மெனி மெல்லஸ்தகி—தொரெ  
கா<sup>3</sup>ளு மெனி ஜல்லஸ்தகி

பெ<sup>3</sup>ட்கி:- ஸொம்ழ் ஸொமந்தும் ஆஸ்தொ நீ:-மொன் னு  
ஸொம்பு கொ<sup>3</sup>ப்<sup>3</sup>பி<sup>3</sup>ம் ராஸ்தேஸ் நீ:  
காயி ஸானி—அம்பா<sup>3</sup>  
காய் இஸனி

கு<sup>3</sup>ம்பு: காயி ஸானி—அம்பா<sup>3</sup>  
காய் இஸனி

தீ<sup>3</sup>கு<sup>3</sup>ம்பு:- ஸௌர தே<sup>3</sup>வி தூ அவ்ரெ தே<sup>3</sup>வி—பொங்க<sup>3</sup>ல்  
ஹுப்<sup>3</sup>பெ<sup>3</sup> ஸொகன் ஜிவ்னம் ஹுப்<sup>3</sup>பின் ஆவி

பெ<sup>3</sup>ட்கி:- ர:க்த வத்தொ கரஸ்தக  
 ராஸ்தக் தா<sup>2</sup>மு நீ:கிவோ  
 நித்த வாடும் ஜாஸ்தக  
 நிம்மதி மொன்னும் தே<sup>3</sup>கீவோ  
 மாயிவோ அம்கொ ஸாகிவோ

கு<sup>3</sup>ம்பு:- மாயிவோ அம்கொ ஸாகிவோ

பெ<sup>3</sup>ட்கொ:- த<sup>4</sup>னவானுக் த<sup>4</sup>க்கஸ்தகி  
 ப<sup>3</sup>லவானுக் த<sup>4</sup>க்கஸ்தகி  
 ஸ்வயம்கனு ஜிவஸ்தக் அமி  
 அப<sup>3</sup>யம் தெ<sup>3</sup>னெ ஆவி த<sup>4</sup>மி

கு<sup>3</sup>ம்பு: ஸ்வயம்கனு ஜிவஸ்தக் அமி  
 அப<sup>3</sup>யம் தெனெ ஆவி த<sup>4</sup>மி

அஸ்கி தெனு: ஸௌரதேவி தூ அவ்ரேதே<sup>3</sup>வி—பொங்க<sup>3</sup>ல்  
 ஹுப்<sup>3</sup>பெ<sup>3</sup> ஸொகன் ஜிவ்னம் ஹுப்<sup>3</sup>பின் ஆவி





## நந்த³பா³லா ஹிந்த³ ஏலா

தொ³ங்க³ர் ஹோர் ஜிவரேஸி நந்த³பா³லா

தொ³னொ பொ³ர் ஸாரேஸி ஹிந்த³ ஏலா

ந:ன்ன நு:ரு தேலா..... (தொ³ங்க³ர்)

அர்மொ ஹொயெ பூ³லு ஹாரு க³ள்ளி—மொர்

ஆ³ஸெ ஹொயெ தே³லு தூஸீ மெல்லி

மொர் ரோடு திரஸ்தோகு க³லரேஸி—பொ³ரெ

லோகு³ர் கரெ பாபுன் த³மரேஸி— (தொ³ங்க³ர்)

கு³ண்டெ³மு ஸேஸ்தேஸ்பா வைகுண்டு

கு³ண்டா³மு பொ³ர்ரேஸ்பா கோவிந்து³

ஸாத் தொ³ங்க³ர் ஹிங்க³கின் ஸான் அவெஸி—ஸாஸ்தக்

ஸஸர் தொ³னொ ரி:யெதி காய் பு³ன்னுஸி— (தொ³ங்க³ர்)





## ஸௌராஷ்ட்ர கோஸே

ஸபீரி தொங்குநு ஸாஸ்தா — பொவெ  
ஸமாச்சாரு ஸங்குனெ மெனி ஆஸ்தொ  
ஸமுஹ லக்ஷினி ஜனுல்னு ஜொவனு நீபா  
ஜகதுமு அமி ஹோர் செடீஸ்தெ கோனகுபா — (ஸபீரி)

தேஸு பந்தி ராஜ்ஜனி  
ஸெத்தர் வாளு ஜெடொ கீனி  
திடீவ்க தீருக ஹோதெ  
தெல்லெ ஸௌராஷ்ட்ர கோஸே

தாக்கு மோல் தயி கீடி  
தாரு காம் லம்புமீ கரி  
தாமாதாம் கரரியெ  
எல்லெ ஸௌராஷ்ட்ர கோஸே

மாயி பாஷா அயிமான் ஸெந்தொ  
மஹான்னு பொவெ தெனு உஜெ ஸமுஹு  
மஹா ஸாஹித்தியம் கரி தீயெ  
தெல்லெ ஸௌராஷ்ட்ர கோஸே

ஸாஹித்ய ரெத்தனு ரசி தீ மெனி  
ஸாஸ்தகு ஜனுல்னு நீஸ்தகு ஹொயி  
ஸபொகின் ஸங்கம் ஹொவ்டெ  
எல்லெ ஸௌராஷ்ட்ர கோஸே



அசாருமு அப்ரஞ்ஜிக ஜீனி  
அமீர்த்து வேதுனு இனி  
அபுல் நுதி லோகும் ருந்தெ<sup>1</sup>  
தெல்லே ஸௌராஷ்ட்ர கோஸே


காழு ஹோர் ஸாக் ஸங்கி<sup>3</sup>  
க<sup>4</sup>ல்லினி சல்லினி எலிங்கி  
காலுரு குரு ஸங்க<sup>3</sup>ன்  
எல்லெ ஸௌராஷ்ட்ர கோஸே

அம்ரெ ஜொமயி தூஸி  
அம்கொ க<sup>3</sup>தி தூஸி  
ஆனந்து தே<sup>3</sup>ஸ்தெ தூஸி

பம்பா நெத்<sup>3</sup>தி<sup>3</sup> ஐயப்பா  
பய்ந்தொ பொடெ<sup>3</sup>ஸி ஐயப்பா  
பாவி கொ<sup>2</sup>ப்<sup>3</sup>டி<sup>3</sup>ம் ஐயப்பா



பொ<sup>4</sup>வெ—அநேக  
லக்<sup>3</sup>கி<sup>3</sup>னி—உணர்ச்சி  
ரசி—ஆக்கிய  
இகி—கற்று  
நுதி—புகழ்





## சலன் ஸக்தி தே<sup>3</sup>

பாய்ஞிகு பாய்ஞ் அனி தொ<sup>2</sup>விஸ்  
பத்தினி தே<sup>3</sup>வு நு:ருகு பாய்ஞி தே<sup>3</sup>  
திய ரோகு<sup>3</sup> ப<sup>3</sup>ரொ கேரி — மீ  
மய வரமு தே<sup>3</sup>னுனி

(பாய்ஞிகு)

மொன்னு தவ்ராம் ஸேஸ்தெனெவோ  
அன்னபூரணிவோ மஹாஜோதிவோ அம்பா<sup>3</sup>  
தொர்நமம் மெனி மக<sup>3</sup>ரீஸ்  
துர்பீஸ் நு:ருகு சலன் ஸக்தி தே<sup>3</sup>

(பாய்ஞிகு)

தொ<sup>3</sup>ளொ ஹுடி<sup>3</sup>கின் ஸா அம்பொ<sup>3</sup>  
தொரெ ஆத<sup>3</sup>ராம் ரீ:ஸ் அம்பொ<sup>3</sup>  
தொக<sup>3</sup> ஹட்வினி ஜிவிஸ் அம்பொ<sup>3</sup>  
மொக<sup>3</sup> அவி பாவி அம்பொ<sup>3</sup>

நு:ருகு<sup>3</sup> சலன் ஸக்தி தே<sup>3</sup>  
கொரிகின் அத்தொ பொ<sup>3</sup>வரிஸ்தெ  
உடாங்க தி<sup>3</sup>வொ பொ<sup>3</sup>வரி ரீ:ஸ்தெ  
பெ<sup>3</sup>டாகு<sup>3</sup> க<sup>3</sup>தி தூஸ் மென் ரீ:ஸ்தெ

(பாய்ஞிகு)

தொ<sup>3</sup>ளாழு லலஸ்தெ பூ<sup>3</sup>லு க<sup>3</sup>ள்ளி  
தெ<sup>4</sup>ருமு மெனஸ்தெ நாரு ப<sup>4</sup>ந்தி<sup>3</sup>  
மாயிவோ தொரெ பாத<sup>3</sup>மு க<sup>4</sup>லிரீ:ஸ்  
காயிவோ ஊமென்னு தூ ரீ:டி ரீ:ஸ்

(பாய்ஞிகு)

தெ<sup>3</sup>ய்டா<sup>3</sup>மு தே<sup>3</sup>வு ஸே மெனெத்  
தென்சிகின் சுருமு ஆவி  
பெ<sup>3</sup>ட்கினுக் தே<sup>3</sup>வு தூஸ் மெனெத்  
பில்லாகு<sup>3</sup> சலடன் த<sup>4</sup>மி ஆவி

அம்பா<sup>3</sup>..... அம்பா..... அம்பா<sup>3</sup>

## அஃனு கீத்

அம்பொ<sup>3</sup> அம்கொ ருபு தீ<sup>3</sup>  
 ஆட் தி<sup>3</sup>க்கும் வாடு தெ<sup>3</sup>க்கடி<sup>3</sup>  
 இஸோஸ் ஜிவ்னெ மெனி ஸங்கி<sup>3</sup>  
 ஈகு<sup>3</sup>ஸ் ஈஸொ மெனி மென்ரீஸ்  
 உஜெ தே<sup>3</sup>ஸு உஞ்சொ செவ்<sup>3</sup>ஸ்தகு  
 ணடொ ஸொக பு<sup>2</sup>த்<sup>2</sup>தி<sup>1</sup> தீ<sup>3</sup>  
 எம தாகு<sup>1</sup> அஸ்க நொக்க மெனி  
 ஏகலய்வனு கு<sup>3</sup>ரு ப<sup>1</sup>க்<sup>3</sup>தி கல்ரீஸ்  
 ஐக்கியம் ஒண்டேஸ் அமர்த்து மெனி  
 ஒண்டொண்டாளு அப்பியாஸு தீ<sup>3</sup>  
 ஓடா<sup>3</sup> ஜாடு<sup>3</sup> ஸொக அம்கொ ஹொவ்டி<sup>3</sup>  
 ஒளரெ ஸௌராஷ்ட்ராம் கீ<sup>3</sup>து க<sup>3</sup>வட்ரீஸ்  
 அம்ரெ ஸௌராஷ்ட்ர மயிகு நமெனு  
 அஹங்காருன் மூள் ஸெங்க<sup>3</sup> கு<sup>2</sup>டெ<sup>2</sup>னு



ஈகு—கல்வி

ஈஸொ—கடவுள்



## பா'ரத மாயிகு நமெனு

பா'ரத மாயிகு நமெனு—தெக  
பாஞிர் பொடி'கின் ஜிவெனு  
பா'டக ஹேம் தெட்டி மெனெனு—அரி  
பா'டக ஹேம் தெட்டி மெனெனு  
பொ'ய்ஞிர் மத்தி ஹொல்லொ ஸெத்து கரி க'வெனு

பா'ரத மாயிகு ஜே.....

பா'ரத மாயிகு ஜே.....

பா'ரத மாயிகு ஜே.....(அம்ரெ பா'ரத)

ஸுலாயுது' ஸொக'ன் தி'ன் தி'க்கும்  
ஸுந்தூ'ர்கன் ஸேஸ்தெ மாய்  
இமய பர்வது'கன் உத்தர் தி'க்கும்  
ஹிப்'பி' ரி:ஸ்தெ பர்வத' வர்த'னி மாய் (அம்ரெபா'ரத)

வேது'னு ரசெ ஸாது'னு தி'யெ  
வேத'வதி'க ஸேஸ்தெ மாய்  
ஸாஸ்தருன் வசெ ஸ்ரேஷ்டுனுக் தி'யெ  
ஸரஸ்வதிக ஸேஸ்தெ மாய்..... (அம்ரெ பா'ரத)

பொ'வெ பூ'ஷுணுன் அங்க'மு க'ல்லி  
பொ'ரெ ஸொம்பு வத'னுமு தொவ்வி  
பூர்ணுக அம்கொ ஆஸினு கர்லி  
பூ'மாதே'விக ஸேஸ்தெ மாய் .....(அம்ரெ பா'ரத)



## ஸௌராஷ்ட்ரம்பொ<sup>3</sup>

ஸௌராஷ்ட்ர மாய்ஹோர் ஆக்<sup>3</sup>ஞொ  
ஸீர் தியெ மாய்ஹோர் ஆக்<sup>3</sup>ஞொ  
அந்து<sup>3</sup>கு தொ<sup>3</sup>னொ மீ ஹுடி<sup>3</sup> தொ<sup>3</sup>வு  
அம்ரெ பா<sup>3</sup>ஷா லலிதம் மீ களடு<sup>3</sup> ... (ஸௌராஷ்ட்ர)

ஸல ஸல கரி அவயி ஜரி ஸொகனு  
ஸப்த ஸ்வர ஸங்கீ<sup>3</sup>து ஸொகனு—ஸௌராஷ்ட்ரம்  
ஸ்ரீ ராமாயணு அம்கொ தீ<sup>3</sup>ராளி  
ஸ்ரீ வேங்கீ<sup>3</sup>டஸூரி மஹான்னு.

உஞ்சாமு இமய பர்வது<sup>3</sup>  
ஹொட்னிமு ஓடா<sup>3</sup> ஜா<sup>3</sup>டு — ஸொக  
ஹொவடி<sup>3</sup> க<sup>3</sup>ல்ராளி ப<sup>3</sup>குவத் கீ<sup>3</sup>தொ  
ஒள்டீயான் பத்மநாபீய்யானு

ரா:ஸு கொ<sup>3</sup>பீபீம் வஸுனொ உங்கா பூ<sup>3</sup>லும்  
ரஸனொ ஸே பூர்ண சா<sup>3</sup>ந்து ப்ரகாஷும்—ஸொக  
தொ<sup>3</sup>ப்பென் ராமராயி அம்கொ தீ<sup>3</sup>ராளி  
அபீ<sup>3</sup>பின் ஸம்பத்துக நீதி<sup>3</sup> ஸம்பு

பொள்ளாம் குள்ளெ கச்சம்பொ<sup>3</sup>  
பொள்கீ<sup>3</sup>னிம் குள்ளெ ஸௌராஷ்ட்ரம்பொ<sup>3</sup>—ஸொக  
கொப்பான் நாயகி தே<sup>3</sup>வுன் கவ்ராளி  
கோ<sup>3</sup>லிந்த<sup>3</sup> கீர்த்தன குள்ளெக

பாஷா ஸுந்தூ<sup>3</sup>ரும் ஈதொ க<sup>3</sup>ளி  
பஸந்து<sup>3</sup> மொதினு கடி<sup>3</sup> தீ<sup>3</sup>ராளி  
அம்ரெ ஸங்கு<sup>3</sup>ன் ஸ்ரீராம் ஆர்யானு  
ஆனந்து<sup>3</sup>க இகுவொ ஸ்ரீதுவினு

★

★

★

அந்து<sup>3</sup>—குருட்டு  
லலிதம்—அழகு  
ஜரி—அருவி  
பர்வது—மலை

உங்கா பூ<sup>3</sup>லு—முல்லைப்பூ  
மொதி—முத்து  
ஈகு—கல்வி  
ஸ்ரீதுவினு—திருக்குறள்

# அபுல்மானு ஜிர்க்கி பொட்ஸ்

ஸௌராஷ்ட்ர ஸமுஹு ககொ<sup>3</sup> இஸொ ஹொய்யொ  
ஸௌராஷ்ட்ர விபி இருனாத்த ஹாலி ஹொய்யொ

ஐக்கியமுகு ஹாது தே<sup>3</sup>னாத்த ஹாலி  
அபுல்மானு ஜிர்க்கி பொட்ஸ் தெக<sup>3</sup> ஹாலி

ஸௌராஷ்ட்ர தீ<sup>3</sup>ருனு பன்டொ ஹொயி ஜியயொஹா  
ஸௌராஷ்ட்ர க்யானு ஸக்தி பு<sup>3</sup>ந்தொ லயயொஹா  
தா<sup>3</sup>கு நீ:த்தெ ஸௌராஷ்ட்ர ஹிந்தொ த<sup>3</sup>க்கி ஜிவ்வாயிஹா  
தெருமு ஸெத்து ஸத்து நிஜ்ஜி ர:வ்வாயிஹா

மளயாள் விபி ஜவன்ன கரெஸ் எழுத்தச்சன்  
மது<sup>3</sup>ர தமிழ் விபி ஜவன்ன கராஸ் பெஸ்கிமுனிவரு  
தொ<sup>3</sup>ப்பென் ராமாயின் ஜவன்ன கராஸ்  
ஸௌராஷ்ட்ர விபி  
தே தொ<sup>3</sup>ப்பி<sup>3</sup> தொ<sup>3</sup>வி- ஜிவெதி ஹோர் செடா<sup>3</sup>யா அயி

அஸி க<sup>3</sup>ளய் ஸௌராஷ்ட்ர மாயி  
அஸ்கி ப்ரகருனும் அம்ர ஜு<sup>3</sup>டி ஹாலி  
க<sup>3</sup>விஹாரு க<sup>3</sup>லொ ஸௌராஷ்ட்ர மாயிகு  
களகாந்தி ஹொய் ஸௌராஷ்ட்ர ஸமுஹு



அபுல்மானு—தன்மானம்  
இருனாத்தஹாலி—கற்காததினால்  
ப்ரகருனு—துறை  
ஜு<sup>3</sup>டி—மொழி





## அலங்கார் கோனெ?


லிக்கி க<sup>2</sup>னொ துமி லிக்கி க<sup>2</sup>னொ  
 தும்.கொ லம்பு<sup>1</sup>ம் ஸொந்தோஷ்  
 லிக்கி ஜிவொ துமி லிக்கி ஜிவொ  
 பொ<sup>1</sup>ரெ கு<sup>3</sup>ம்பு ஹிந்தோஸ் ... .. (லிக்கி)

உக்<sup>2</sup>கு<sup>2</sup> மெனிகின் ஹொட்ராஸி — வகாக்  
 கொக்கு மெனிகின் மெனட<sup>3</sup>ராஸி  
 ஜு<sup>2</sup>க்கு வத்தான் ஸிங்கராஸி—ஜு<sup>2</sup>டி<sup>3</sup>ம்  
 லிக்கு கவ்லி க<sup>4</sup>லராஸி ... .. (லிக்கி)

முக்<sup>3</sup>கு<sup>3</sup>ன் க<sup>4</sup>லெத் கே<sup>4</sup>ருக் ஸிங்கார்—ஸௌராஷ்ட்ர  
 பொ<sup>3</sup>க்<sup>3</sup>கு<sup>3</sup>ன் இகெ<sup>3</sup>த் ஜிவ்னம் அலங்கார்  
 வெக்கி ஸியெத் அப்<sup>3</sup>ப<sup>3</sup>ய் அம்ர பாஷா ப<sup>3</sup>துன்—சொக்கட்  
 ஜக்கி ஜிவெத் ஹுப்<sup>3</sup>ப<sup>3</sup>ய் ஸொம்பு தே<sup>3</sup>வுனு கீ<sup>3</sup>தும் (லிக்கி)



வகொ—கொக்கு  
 ஸிங்கராஸி—மாற்றுகிறார்கள்



## ஐகோ

ஸங்கீன் அவெயொ ஸங்கு<sup>3</sup>தரியொ—வீது<sup>3</sup>ரு  
ஸங்கீமுன் ஸமுஹமுக தெ<sup>3</sup>ள்சட்டுனெ

ஸௌர பா<sup>4</sup>ஷொ இக<sup>3</sup>ட்<sup>3</sup>டு<sup>3</sup>னெ  
அவ்ரெ பா<sup>4</sup>ரது செவ்ந்துனெ.....

(ஸங்கீன்)

மொ:ட்டானு உஜாஸி — மொ:ட்டொ  
மொ:ட்டொ விஷயன் ஸங்கா<sup>3</sup>ஸி  
பிட்டு மெது<sup>3</sup>டு<sup>3</sup>ம் ஹிங்க<sup>3</sup>ய் மெனி  
ப்ரயத்தனு கரி ஸினாஸி.

கொன்னி கொட்டி சல்லுஸ்தகு  
மொன்னு முட்டி மொர்ராஸி  
மொரெ ஹாஸி முஸு<sup>3</sup>னா மெனி  
மொக மெள்ளி குளாயி

நி:யெதி மெள்ளொ (ஸங்கீன்)

தொ<sup>3</sup>ஸ்கா கே<sup>3</sup>ஸு ரீ:கின் மொட்டெசனு  
அஸ்க ஸுவாஸொ ரீ:கின் கெட்டெகனு  
தீ<sup>3</sup> தொளொ ரீ:கின் கு<sup>3</sup>ட்<sup>3</sup>டெ<sup>3</sup>கனு — களொ  
தெ<sup>3</sup>ய்டொ ஸொகனு ஜிவஞ்ஜாரியொஹா

மப்பு ஹட்வன் மொன்னும்கெ ஹெட்டெ  
ஹப்<sup>3</sup>பு<sup>3</sup> ஸொகன் ஜிவஸ்தெ ஸொட்<sup>3</sup>டெ<sup>3</sup>  
கொப்<sup>3</sup>பு<sup>3</sup> ஸொக<sup>3</sup>ன் ஜிவஸ்தக் பா<sup>4</sup>ஷொ க<sup>3</sup>ள்ளெ  
கொ<sup>3</sup>ப்<sup>3</sup>பி<sup>3</sup>ம் ஸொம்பு ஜிவ்னம் கு<sup>3</sup>ள்ளெ (ஸங்கீன்)

ராமராயினு நீதி ஸம்பு  
 ராதிம் தீஸும் இகுனெ  
 நடன கோபால் நாயகினு  
 நாமாவளி நிச்ச நிச்ச இகுனெ

ஸெத்து வத்தானு

புதுதுகன் ஸங்கிரியாஸி

ஹத்தா முதுது அய்கி துமி

முத்தா பொங்கல் கய்தி குங்கிரியாஸி... ..

(ஸங்கின்)

o o o

ஈசு—கல்வி

இகட்டுனெ—கற்று தரவேண்டும்

மெதுட்—மூளை

ப்யத்தனு—முயற்சி

மப்பு—இருமாப்பு

புதுது—மொத்த



## ஹட்வன் தா<sup>4</sup>னு அஸ்கீகாமுன்

பெ<sup>3</sup>ட்கி:-

அம்ரெ பா<sup>4</sup>ஷாம் கீ<sup>3</sup>துன் அய்கெத் ஆஸ்தொ லக<sup>3</sup>ளேரி—ஹனி)  
ஆனந்து<sup>3</sup> ஹோர் கீ<sup>3</sup>துனு க<sup>3</sup>விகின் அமிஏட் ஜீவெங்கனு

—அளினி

அமிஏட் ஜீவெங்கனு..... (அம்ரெ)

பெ<sup>3</sup>ட்கொ:-

அம்ரெ பா<sup>4</sup>ஷாம் கீ<sup>3</sup>துன் கொ<sup>3</sup>பி<sup>3</sup>ம் அய்கெத் இன்பூஸரி—ரா:யி  
ஆனந்து<sup>3</sup> ஹோர் தே<sup>3</sup>வூனு கீ<sup>3</sup>துன் அமிஏட் க<sup>3</sup>வெதீளி

—செரிகின்

அமிஏட் க<sup>3</sup>வெதீளி.....(அம்ரெ)

பெ<sup>3</sup>ட்கி:-

ராதிம் தீ<sup>3</sup>ஸும் பா<sup>4</sup>ஷா ப<sup>4</sup>க்தீஸ் ரா:த்திஸ ஜிவ்னெ—அஸ்கின்

ஸாத்திஸ ஜிவ்னெ—இன்பு

வாகுஹோரு அஸ்கின் மிளிகின் ரா:த்திஸ ஸீல்னெ—கெ<sup>4</sup>னமு

ரா:த்திஸ ஸீல்னெ

பெ<sup>3</sup>ட்கொ:-

ஹட்<sup>3</sup>வன் தா<sup>4</sup>னு அஸ்கி காமுன் அத்தொ ஏட் சவெதீஸ்—விர்தா  
வத்தொ ஏட் திரெதீஸ்

அம்ரெ ஸமுக<sup>3</sup>ம் ஹொல்லொ அவய்

அம்ரெ பா<sup>4</sup>ஷொ ஹொல்லொ அவய்—ஸௌர

பா<sup>4</sup>ஷொ ஹொல்லொ அவய்.....

(அம்ரெ)



## பா<sup>4</sup>து<sup>3</sup>கு ஸியதி

பெ<sup>3</sup>ட்கி:-

ஹரி தா<sup>3</sup>ஸுக் தா<sup>3</sup>ஸு ஹொயெத் ஸொம்பு தே<sup>3</sup>ய்—சொக்கட்  
ஹட்<sup>3</sup>வன் ஸெர ஸெத்துவாடு ஸங்கி<sup>3</sup> தே<sup>3</sup>ய்—லம்<sup>3</sup>பும் .. (ஹரி)

பெ<sup>3</sup>ட்கொ:-

பா<sup>4</sup>ஷானு இகெ<sup>3</sup>தி பு<sup>4</sup>விர் ப<sup>4</sup>க்<sup>3</sup>தி ஏடு ஸாஸ்வதம்  
பா<sup>4</sup>து<sup>3</sup>கு ஸியதி<sup>3</sup> ஹிந்தொ<sup>3</sup> பாபுனு அவய் ஸெணம் (ஹரி)

பெ<sup>3</sup>ட்கி:-

ப<sup>4</sup>க்<sup>3</sup>தி கீ<sup>3</sup>துன் க<sup>3</sup>வ்ராஸி தே<sup>3</sup>வுனு—தே  
படன கரெத் மோஷி அப்<sup>3</sup>ப<sup>3</sup>ய் ஜவ்ணனுக்

பெ<sup>3</sup>ட்கொ:-

ஹிந்தொ ஏடு ஹட்<sup>3</sup>வன் அம்ரெ பா<sup>4</sup>ஷாமு—ரி:யெத்  
ஹீரும் பனி ஊடொ ஸொகன் தெளிவுனு... .. (ஹரி)

பெ<sup>3</sup>ட்கி:- ஆது<sup>3</sup>ருவொ அறிவு அப்<sup>3</sup>ப<sup>3</sup>ய் ப<sup>4</sup>க்<sup>3</sup>திமூஸ்—தே

பெ<sup>3</sup>ட்கொ:- அய்கெத் இன்பு உரரேஸி மொன்னுமு

பெ<sup>3</sup>ட்கி:- அப்ரஞ்ஜி அம்ரெ பா<sup>4</sup>ஷா வத்தானு—ஏ

பெ<sup>3</sup>ட்கொ:- அங்கு<sup>3</sup>ன் அமி ஹொவ்<sup>3</sup>டெ<sup>3</sup>ன் அவொ: ந:ன்னுனு  
(ஹரி)



இகெ<sup>3</sup>தி—கற்றூல்



# ஜிவ்னம் வினன் விங்கரு

அம்பொ<sup>3</sup> மெனஸ்தெ தே<sup>3</sup>ஸு போ<sup>3</sup>டும் உஜி  
அங்கு<sup>3</sup>ண்டெ லோகு<sup>3</sup>ம் அவன் தி<sup>3</sup>ன்னு ஸீ  
அம்ஸங்கன் ஸங்கா<sup>3</sup>ஸ் தெனு பு<sup>4</sup>லோகும் ஸே.

எல்லெ

ஸ்ரீ ஸரீரும் காவ் ஸேஸ்தெ  
ஜீவ் ஸொட்<sup>3</sup>டி<sup>3</sup> ஜாஸ்தெ தி<sup>3</sup>ன்னு  
ஸீ ஸங்காஸ்தெனு கோன் ஸே.

அவய் மெனெஸ்தெ ஜாய் மெனெஸ்தெ  
அஸ்கி வேள் மெனெஸ்தெனெ  
அம்ரெ ஜிவ்னம் வினன் விங்கரு

தெனெ

தாத் கட<sup>2</sup>ஸ்த வேளு அமி  
த<sup>4</sup>க்கி ரொடெ<sup>3</sup>திகாய் பய்ந்தொ பொடெ<sup>3</sup>தி காய்  
த<sup>3</sup>யெ த<sup>3</sup>க்ஷன் தெ<sup>3</sup>க்கட<sup>3</sup>யிஹா





## ஆனந்து<sup>3</sup> ரோடு<sup>3</sup>கு வாடுனு

ரொடி<sup>3</sup> ரொடி<sup>3</sup> ஜிவஸ்தஹா ஜிவ்னமு—ஜெஜும்  
ரொஸெதி<sup>3</sup> அப்<sup>3</sup>பிஸ்தெ கொ<sup>2</sup>ப்<sup>3</sup>பிமு மவ்னமு... .. (ரொடி<sup>3</sup>)

மெனிக் உஜெ வேங்கு<sup>3</sup> ரொட்<sup>3</sup>னோரே—நீ:ஜியெத்  
மென்கான் சுட்டு பி<sup>3</sup>ஸி ரொட்<sup>3</sup>னோரே ... .. (ரொடி<sup>3</sup>)

இவர் நீ:ஸ்த ரொடெ<sup>3</sup>யொ நு:ரு வேளு  
இக்கெயொ மெனி ரொடெ<sup>3</sup>யொ ஈகு<sup>3</sup> வேளு  
காம் அப்<sup>3</sup>பிரெனி மெனி ரொடெ<sup>3</sup>யொ ஜவ்ணு வேளு  
காலுக் கொளார் ஸங்கி ரொடெயொ முதுல்லா வேளு(ரொடி<sup>3</sup>)

உச்சலாவ் பு<sup>2</sup>ரெனி மெனஸ்தவேள் ஒண்டெ ரோடு<sup>3</sup>  
உராவ் ஹோரெனி மெனஸ்தவேள் ஒண்டெ ரோடு<sup>3</sup>  
ஹாராடு<sup>3</sup> ஹோயெனி மெனஸ்தவேள் ஒண்டெ ரோடு<sup>3</sup>  
ஹோயெத்தெர் நு:ரு அப்<sup>3</sup>பிரெனி மெனஸ்தவேள்  
ஒண்டெரோடு<sup>3</sup>.. (ரொடி<sup>3</sup>)

பூ<sup>4</sup>குக் ஸோகு<sup>3</sup>க் ஸுக்கஸ்த வேள் ரொட்<sup>3</sup>னு  
ரோகு<sup>3</sup> தா<sup>4</sup>கு<sup>3</sup>ம் ஸம்ட்<sup>3</sup>ஸ்த வேள் ரொட்<sup>3</sup>னு  
மொனமு ஜாஸ்த வேள் ஹல்லி ரொட்<sup>3</sup>னு  
மொரனு அவஸ்த வேள் தெ<sup>3</sup>ல்லி ரொட்<sup>3</sup>னு ... .. (ரொடி<sup>3</sup>)

அங்கு<sup>3</sup>ன் ஸெஸ்தெ ஒளதினொ ரோடு<sup>3</sup>னு  
ஆயுஸ் ராலெந்து அம்கொ ரோடு<sup>3</sup>னு  
ஆனந்து<sup>3</sup> ரோடு<sup>3</sup>கு ஸங்கிராஸ் வாடுனு  
அம்ரெ நடன கோபால நாயகி தே<sup>3</sup>வுனு ... (ரொடி<sup>3</sup>)

★	★	★
ஈகு—கல்வி	காலு—காலம்	
ஜவ்ணு—இளைஞன்	உச்சலாவ்—வருமானம்	

## கா<sup>3</sup>ம் (டவுன்) ஸொடி<sup>3</sup> ஜாஸு

மகா காழுகின் அம்ரெ கா<sup>3</sup>முகு—சொக்கட்

கா<sup>3</sup>டு தய்ராஸ் விங்கரு

பொ<sup>4</sup>ம்பி<sup>3</sup> தி<sup>3</sup>ஜள்ளி வினிகின் மெள்ளொ

பூ<sup>4</sup>குக் ஸுக்கஸ் ஸொம்மரு

... (மகாகாழுகின்)

பொவ்ஸுகு வராகு ஹுனுகு ஸமள்சி

பொண்ணி கரஸ்தகு விங்கருனு ஒள்சி

பெ<sup>4</sup>ய்ஸு கெ<sup>4</sup>த<sup>3</sup>டு<sup>3</sup> ஸுனெ மஞ்ஜிரி

பெ<sup>4</sup>ண்டு துரிகின் தாகுனு தொட<sup>3</sup>ஸு

மில்லாகு பெ<sup>3</sup>ய்லுகு காழுனு க<sup>2</sup>டயி

மில்லஸ்தகு மில்லு பொட்டொ க<sup>2</sup>டயி

ஹேது நீஸ்தெ எல்லெ காம்

ஹாது தே<sup>3</sup>ய்றா அம்ரெ கா<sup>3</sup>ம்

விங்கருக் ஹோந்தகெ பா<sup>3</sup>த்<sup>3</sup>தி<sup>3</sup>யமு

வீது<sup>3</sup>ருஸ் கொ<sup>3</sup>ப்<sup>3</sup>பி<sup>3</sup>ம் ஸாத்தியமு

அம்கொ த<sup>4</sup>னாதிபதின் ராஜ்ஜலன்

அமி தெங்கஸெய் போட் ஜள்ளன்

ராதிம் தீ<sup>3</sup>ஸும் வினிகின் தீ<sup>3</sup>ல்லொ

ராஸ்தெ கொ<sup>3</sup>ம்மொ லொவ்லெ பில்லொ

ஹொக<sup>3</sup>து<sup>3</sup> வேஸுக் நீஸ்தக் தெனெ

ஒத்தி ஜாஸு மக<sup>3</sup> வினஸ் தெனெ.



## ருவ்வொ ஹிப்'யொ<sup>3</sup>

ஸிங்கா<sup>3</sup>ர்க ஜிவஸ்த ஸொட்<sup>3</sup>டி<sup>3</sup>  
ஹங்கார் கோகோ தாது தட்டி  
விங்கர்னுஹோ... ... விங்கர்னுஹோ

கோன் தி<sup>3</sup>னுஸுன் கெர்னெ மெனெத் கெரி தெ<sup>3</sup>க்கட<sup>3</sup>ன்  
கோகோ இஸொ நேலு வஸ்தர் க<sup>2</sup>டி<sup>3</sup> வவர்ஸுன்  
கிர்மொகனு மகொ<sup>3</sup> வினெதி<sup>3</sup> ஹோர் செடு<sup>3</sup>வாய்—துமி  
அர்மொகனு அம்ரெ கா<sup>3</sup>மு கே<sup>4</sup>ர் க<sup>2</sup>டு<sup>3</sup>வாய் (விங்கர்னுஹோ)

பெ<sup>4</sup>டெ<sup>3</sup> மெனெஸ்தெ மொது<sup>3</sup>ரளி மெனெஸ்தெ பே<sup>4</sup>து<sup>3</sup>  
ஸொடி<sup>3</sup>

ப்<sup>4</sup>யார் ஸாரும் ஸமர்த்து கொ<sup>2</sup>ப்<sup>3</sup>பி<sup>3</sup>ம் அமி தெ<sup>3</sup>க்கடி<sup>3</sup>  
ஜனுல்னுக் ஒப்பயெ ஸொகன் மகொ<sup>3</sup> வினடி<sup>3</sup> —ஏ  
ஜக<sup>3</sup>து<sup>3</sup>மு உஞ்சகனு ஜண்டா<sup>3</sup>வ் ஹுட்<sup>3</sup>டி<sup>3</sup>... (விங்கர்னுஹோ)

ரீ:யவராஸ் அம்ரெ தெனு ஒள வரெனும்  
நி:யெதி மெள்ளொ வவ்ருலுனெ தே ப்ரகருனும்  
ஜிவஸ்தக் அமி ஸிக்குலுனெ ஸிலேத் ரீ:கின்—அப்<sup>3</sup>ப<sup>3</sup>ய்  
ஸ்ரேஷ்டு மெனன் பெ<sup>4</sup>ளி உச்ச க<sup>3</sup>ரன் ... (விங்கர்னுஹோ)



நேலு—இயந்திரம் (மிஷின்)  
கிர்மொ—ஒழுங்கு  
அர்மொ—அருமை  
பெ<sup>4</sup>டெ<sup>3</sup>—அடிமை  
பே<sup>4</sup>து<sup>3</sup>—வித்தியாசம்

ஜண்டா<sup>3</sup>வ் —கொடி  
வரெ—வர்தகம்  
ப்ரகருனு—துறை  
ஸ்ரேஷ்டு—சீர்மிகு  
க<sup>3</sup>ரன்—புகழ்



## ஸமதா<sup>3</sup>னு

ரோஜா:- அலுவல்..... மல்லிகா

மல்லிகா:- காயலுவல்..... ரோஜா

ரோஜா:- மல்லிகா..... மல்லிகா

கோடு ஜாரிஸ்தெ ரொவ்வொ ஸங்க<sup>3</sup>கா

கோனெ ஸொம்புகன் நொவ்வொ சல்னி சலரிஸ்தெ

மல்லிகா:- மீ— லெகினு மொண்ட<sup>3</sup>வுக் எலங்கா<sup>3</sup>ரு தீ<sup>3</sup>கின்  
 லெகுஸ்தொ ஸேஸ்தெங்கொ வஸு<sup>3</sup>னெ சிலிஞ்சிகின்  
 ஹொராடு<sup>3</sup>க் அவஸ்தெங்கொ ப்ராந்தி<sup>3</sup> க<sup>3</sup>லிகின்  
 ஹொராடு<sup>3</sup> நொவ்ரி வெனிம் ஜொலிஞ்சஞ்  
 ஜாரிஸ்தெ—மீ

ரோஜா:- தா—நொவ்ரி தொ<sup>3</sup>ஸ்காம் மொட்டுமு ஜொலுஞ்சனு  
 முஸயி

மீ—நொவ்ரா கெ<sup>3</sup>ளாம் தெலி து<sup>3</sup>ளனு ஜாரிஸ்தெ  
 தா—அஸ்கி வஸு<sup>3</sup>னெ தீ<sup>3</sup>டி<sup>3</sup>கின் வட<sup>3</sup>னு ஜாரிஸ்தெ  
 மீ—அவஸ்தெங்க ஹாதும் அஸ்கி க<sup>3</sup>ளனு ஜாரிஸ்தெ—மீ  
 அவஸ்தெங்க ஹாதும் அஸ்கி க<sup>3</sup>ளனு ஜாரிஸ்தெ  
 வத்தாபுட்கி... ... வத்தாபுட்கி  
 வஸ்து இக்கேஸ்தொ—தொரெ  
 வஸு<sup>3</sup>னாக்கின் அங்கு வனிகு மீ  
 உன்னெ ஹொயிஸ்தொ

மல்லிகா:- கொபடு நீஸ்த மொன்னுக் மொக ஸாமதி  
 ஸங்கீனு—மொட்டொ  
 கவிமானு அஸ்கி காவியமு சொக்கட் தா<sup>2</sup>மு தே<sup>3</sup>னு  
 வஸந்த காலு அவெதி<sup>3</sup> புஜ்ஜாய் மொக ஸாஸ்தக்  
 அல்லட<sup>3</sup>னு—தொரெ  
 வத்தொ கானும் பொடெதி<sup>3</sup> புஜ்ஜாய் க<sup>2</sup>ட குஸ்காய்  
 மெல்லனு—அவ

க<sup>2</sup>டா பெட்கி ....க<sup>2</sup>டா பெ<sup>3</sup>ட்கி  
 வடொ இக்கேஸ்ஹா—தொரெ  
 வஸ்துகின் ஸுய ஆஸ்திகு மீ  
 உன்னொ ஹொயீஸ் ஹா

ரோஜா:- தூ பு<sup>2</sup>லஸ்தெ முல்லாம் பஜாரும் அவி  
 பு<sup>2</sup> மெனிதேறாயி

மல்லிகா:- தூ லகஸ்தெ வேளு ஹாத் தெ<sup>4</sup>ரெதி லலிகினு  
 ஜாயி

ரோஜா:- தூ ஹொடஸ்த வேளுஸ் கொம்மொ வெக்கிலிஸ்  
 தெனொ

மல்லிகா:- தெல்லெ வக்கு நீஸ்தக் பெத்தெ ரீ:கின் தூ  
 துக்கிலிஸ் தெனொ—அவ

க<sup>2</sup>டா பெட்கி... ..க<sup>2</sup>டா பெட்கி  
 வடொ இக்கேஸ்ஹா—தொரெ  
 வஸ்துகின் ஸுய ஆஸ்திகு மீ  
 உன்னொ ஹொயீஸ்ஹா

—: ஏ வேளு கமலு அவஸு:—

ரோஜா	கமலு பெய் <sup>4</sup> னு கமலு பெய் <sup>4</sup> னு
மல்லிகா	காணு தீ <sup>3</sup> கின் அய்கிகா—அம்ரெ
	தீ <sup>3</sup> தெமாம் மொட்டொ கோனு மெனி
	தெளிவ்க ரொவ்வொ ஸங்கி <sup>3</sup> கா

கமலு:- புலஸ்தெ பூலுன் அஸ்கி

பூலுர் லஸ்தெ ஸ்திரமு பெய்யின்வோ—ஒனொ  
வம்பு வத்தான் கெரன் மெனிகு ஸொகூனு  
வடொ ஹொய் ஜானுன்கோ பெய்யின்வோ

லோகூமு சொக்கட்யொ காயொ?

ரோஜா:- ப்ரேவ் ஸெங்கு கரன் தாஃனு

கமலு:- தெல்லெ தாஃனும் சொக்கட்யொ காயொ?

மல்லிகா:- சொக்கட் தாஃனு ஹொடின் நிதாஃனு

கமலு:- தெமாழு சொக்கட்யொ காயொ?

ரோஜா:- அஹிம்ஸாமூர்த்தி மஹாத்மா காந்தி  
ஆலோசன ஸங்கு லோகூ ஸமதாஃனு

கமலு:- தே—அமி ஜல்வி சல்லுனொ  
அஸ்கி செரி மெல்லுனொ—தெப்பொ  
அப்பிய ஸமதாஃனு—கொட்டிம்  
ஹுப்பிய ஸமதாஃனு

ரோஜா } தே அமி ஜல்வி சல்லியன்  
மல்லிகா } அஸ்கி செரிகின் ரீனியன்  
கமலு }



ப்ராந்தி—மயக்கம்

ஸாமதி—உதாரணம்





## அறி நக்தொ

பொ<sup>3</sup>ட்<sup>3</sup>டு கெ<sup>3</sup>ளாம் பொட்<sup>3</sup>னாஸ்திக்காம்

பா<sup>3</sup>ளி பூ<sup>3</sup>ளிர் லய்னாஸ்தக் நசிஸ்தெ—தூ

போடும் அவெயொ ஜல்னாஸ்திக்காம்

மொன்னு பொ<sup>3</sup>ரி ஸொம்பும் நசிஸ்தெ

போ<sup>3</sup>ர் ம:டா<sup>3</sup>ம் பு<sup>3</sup>லோக் ஸாஸ்தகு

ஹவுர் பொடி<sup>3</sup> தூ நசெஸ்தெ—தூ

பூ<sup>3</sup>ளிர் அவ்னாஸ்திக்காம் தொர் ப<sup>3</sup>ரப்

மொர் வெதுர் நசெஸ்தெ.

உக்<sup>2</sup>கு<sup>2</sup> உங்கு<sup>3</sup> மெனஸ்த வேனா

உராவ் வத்தான் நக்தொ—தூ

ஹு<sup>3</sup>டொ பொடி<sup>3</sup>கின் ஜிர்க்கஸ்த வேனா

ஊடு<sup>3</sup>தொ பகி<sup>3</sup>ன் நக்தொ

ந:ன்ன சல்னி சலெஸ்தெ ஸீனி

ந:ன்ன ஜஸ்து நக்தொ—தொரெ

ஸொன்னா ருபு நீடொ<sup>3</sup> ஸீகின்

உன்ன நீஸ்தக் அமி நக்தொ.

ஹு<sup>3</sup>ரி கு ஜாஸ்த ஸிங்கா<sup>3</sup>ர் ஸீகின்

ஹு<sup>3</sup>ப்<sup>3</sup>ஸ்த ஆஸ்தொ நக்தொ—தொரெ

ஸொரிவு அப்<sup>3</sup>பெ<sup>3</sup>யொ மெல்னி மெல்னி

ஸிங்க<sup>3</sup>தின் து<sup>3</sup>ங்கி<sup>3</sup> து<sup>3</sup>ங்கி<sup>3</sup> நக்தொ

அவ்ரெ பா<sup>3</sup>ஷொ இகெயொ ஹானி

ஸௌராஷ்ட்ர ஸாஹித்ய நக்தொ—தூ

அம்ரெ ஸமூஹ ராடு ஹொயி

ஆனத்து<sup>3</sup>ம் கொ<sup>3</sup>ப்<sup>3</sup>பி<sup>3</sup>ம் அமி நக்தொ.



ஹு<sup>3</sup>ரி —பள்ளிக்கூடம்

இகெயெ —கற்று

ஸொரிவு —சிநேகம்

ராடு—மன்னன்

## அம்கொ ஏட் தி<sup>3</sup>வளி

ஹுப்<sup>3</sup>ப<sup>3</sup>ய் மொன்னு தூ கா<sup>2</sup>ளி  
 அப்<sup>3</sup>ப<sup>3</sup>ய் ஸொம்பு தெக ஹா<sup>2</sup>ளி  
 உல்லாஸும் அம்கொ ஏட் தி<sup>3</sup>வளி  
 ஊடுதான் களஸு ஒகோகு த<sup>4</sup>மஸு  
 ஊமென்னு ரீ:ரேஸ்கி ரா ... .. (ஹுப்<sup>3</sup>ப<sup>3</sup>ய்)

க<sup>3</sup>வ்லானும் ஒண்டேஸ் ஒண்டெ  
 ஹுதார்கனு தே<sup>3</sup>ரா  
 கொலுக்கும் களரேஸ் தொர் ரு<sup>4</sup>  
 ஏட்டாவ்ரா  
 ஹுட்வனு தொரெ ஹோரு மீ  
 தொ<sup>2</sup>வில் ரீ:ஸ்ரா  
 அளிகின் மொக தூ அளி க<sup>2</sup>பி ஸாரா  
 ஜவ்ணனும் மேடு ஹொய்கின் தூ ஏடு  
 ஜ்வளிஞ்சேதி ஆனந்து<sup>3</sup>ரா ... (ஹுப்<sup>3</sup>ப<sup>3</sup>)

சித்ரபூ<sup>3</sup>ல் ஸொகனு செதுரய் மத்தாபு  
 ஸா ஏடு பிர<sup>2</sup>ரேளி ஸங்கு<sup>3</sup> சக்ராலு  
 கித்தகதி க<sup>3</sup>வெதி மீ முஸு=னாஸ்தித கீ<sup>3</sup>து  
 கீஷ்டு ஸொகனு உஜிரெளி பு<sup>4</sup>விரு  
 சல்னிமு ராடு ஸனிமு ஸே ப்ரேவு  
 ஸானாஸ்த ஜீவு நீ:ரா ... (ஹுப்<sup>3</sup>ப<sup>3</sup>ய்)



ஜவ்ணனும்மேடு - இளைஞர்களின் தலைவனாக.

ராடு - ராஜா.

## பா<sup>4</sup>ஷானு ஈகீ<sup>3</sup>கின்

அந்தூ<sup>3</sup>ஸு மாயிவோ அப்ரஞ்ஜி வர்ணுவோ  
ஆவிவோ அஸிலிகின் அம்பொ<sup>3</sup> ஜோவன்  
ஆராரோ மெனிகின் ஆஞ்ஜி கீ<sup>3</sup>த் கீ<sup>3</sup>விகின்  
ஹாதூமு ஹிந்தி<sup>3</sup>ஸு அவ்டெ<sup>3</sup> ஜோவன் ... (அந்தூ<sup>3</sup>ஸு)

எரிங்கா<sup>3</sup>ரு பிள்டனு கீ<sup>3</sup>ள்ளி - தூ  
செந்தா<sup>3</sup>முக் ஸெங்கு<sup>3</sup> ஹாதூனு ஹவ்லி  
பொ<sup>3</sup>வட்ணத்தக் ரீ:லே ரொட்ணைக மாயி  
பொ<sup>3</sup>ல்லூஸு கேடு<sup>3</sup>மு கா<sup>3</sup>யி ... (அந்தூ<sup>3</sup>ஸு)

பா<sup>4</sup>ஷானு ஈகீ<sup>3</sup>கின் ஜிவ்னெ - ஸௌராஷ்ட்ர  
பா<sup>4</sup>ஷானு ஈகீ<sup>3</sup>கின் ஜிவ்னெ - தூ  
பா<sup>3</sup>புகு ப<sup>3</sup>ல்தீபா<sup>2</sup>ர் நமஸ்காரு கர்னெ  
ஆது<sup>3</sup>ருவொ தீ<sup>3</sup>ட்னெ ஆஸானு ஸொட்னெ  
ஆசார்கன் கொ<sup>2</sup>ப்<sup>3</sup>பீ<sup>3</sup>மு ரீ:ட்னெ - (அந்தூ<sup>3</sup>ஸு)

மோ:ர் ஸொகனு தூ நசிகின் கா<sup>2</sup>ளி - மொர்  
மொன்னுமு ஸொம்புனு வித்தூனு கா<sup>4</sup>லி  
கொகிலாக பொ<sup>3</sup>வ்லி ஹம்ஸொக சல்லி  
கொப்பானு தே<sup>3</sup>வூனுக் மெல்லி ... ... (அந்தூ<sup>3</sup>ஸு)



பா<sup>4</sup>ஷானு ஈகீ<sup>3</sup>கின் - (தாய்) பாணஷயை கற்றுக்கொண்டு.



## ஊடு<sup>3</sup>தொ

ஊடு<sup>3</sup>தா ஊடு<sup>3</sup>தா த<sup>4</sup>மி ஆவி

ஓண்டெ வத்தொ ஸங்கு<sup>3</sup>ஸு ஆவி

இம்<sup>3</sup>ளா ஜா<sup>2</sup>டு<sup>3</sup> ஹிங்கி<sup>3</sup>ஆவி

கொம்பு<sup>3</sup>ளொ பொள்ளொ க<sup>2</sup>ள்ளி ஆவி

ஹத்<sup>3</sup>து<sup>3</sup> பொள்ளொ தே<sup>3</sup> மொக

ஹத்<sup>3</sup>து<sup>3</sup> பொள்ளொ ஸே தொக

செரி செரி தீ<sup>3</sup> தெனு

சவி சவி க<sup>2</sup>யங்கனு



## ஐகீது அளினும் ஸிம்ஹுக

நொவ்ரிக அவத்த அளி கோனு - மொன்னு  
பொவ்ரி ஐகீயஹா ஸங்கெ தாது ... நொவ்ரிக

குணவதி ஸொக குங்கும் கீல்யஹா - அம்ர  
கொப்பான் தேவீவுனுகு பாயம் பொள்ளயஹா ... நொவ்ரிக

வெக்கிஹெடெ மொதி ஸொக  
லிக்கி ரியெ நீதி ஸம்பு  
ரக்கி ரீகின் இகித்தெனொஹா  
துக்கி மொன்னும் தொவ்லிரித்தெனொஹா ... நொவ்ரிக

தேஸு பகீத்திம் பெளி தீருக  
சித்தூர் ராணி பத்மினிக  
ஐகீது அளினும் ஸிம்ஹுக  
ஜான்ஸி ராணி ஸொக ராயஹா ... நொவ்ரிக

வாஞ்சனும் மாயி ஸொக  
வத்தாம் தூது ஸொக  
பொள்கீனிம் நுரு ஸொக  
பொரெ ஸிங்காரு ரதி ஸொகஸேஹா ... நொவ்ரிக



அளி - மங்கை

ஸிம்ஹு - சிங்கம்

ஈரு - கல்வி

இகித்தெனொஹா - படித்தவளா

## ஏஸ் அமர்த்து

பெ<sup>3</sup>ட்கொ:- அம்கொ ஹிந்தொ<sup>3</sup> ஸாந்தி முஹுர்த்து  
ஆனந்து<sup>3</sup>க ஸொம்பும் மீ ஜுர்த்து ... (அம்கொ)

பெ<sup>3</sup>ட்கி:- துரெ மொன்னுகு மீ நிவ்ருத்து  
துமி மய்னாஸ்தகு மீ பொ<sup>1</sup>வ்ருத்து ... (துரெ)

பெ<sup>3</sup>ட்கொ:- அவ்<sup>3</sup>டெ<sup>3</sup>வொ அந்தாஸு நரெனா குருத்து  
அவ்<sup>3</sup>ரெ ஸ்ரீது<sup>3</sup>வினு காமபா<sup>4</sup>கு<sup>3</sup> அர்த்து  
கோஸெ விம்பு<sup>3</sup> வனி கு<sup>3</sup>ர்த்து  
கோஸு ரி:யெதி லாம்க தெ<sup>4</sup>ர்த்து ... (அம்கொ)

பெ<sup>3</sup>ட்கி:- தீ<sup>3</sup>டுகு ப்ரேமு ஹோடு<sup>3</sup>னு தீர்த்து  
திர்னா ஐதஜதொ ஏஸி அமர்த்து  
கா<sup>2</sup>னாமு அட்<sup>3</sup>ட<sup>3</sup>மவெ ஹோங்கு மார்த்து  
க<sup>2</sup>ள்னிமு தெக்கட்டுனா தும்ரெ ஸமர்த்து ... (அம்கொ)



ஸ்ரீது<sup>3</sup>வினு - திருக்குறள்  
காமபா<sup>4</sup>கு<sup>3</sup> - இன்பத்துப்பால்  
லாம் - நீண்ட  
ப்ரேமு - காதல்



## ஜவ்னி ஸங்கீ<sup>3</sup>

பெ<sup>3</sup>ட்கி:- ஹொராடு<sup>3</sup> கெல்லஸ்தகு ஆஸ்தொஹா  
 பு<sup>4</sup>விராடு மெனஸ்த ஹட்<sup>3</sup>வனுஹா - மொரெ  
 புஸ்னிகு தூ ஜவ்னி ஸங்கெ<sup>3</sup>தி<sup>3</sup>  
 பொ<sup>3</sup>ட்டு ப<sup>4</sup>ந்<sup>3</sup>துவாய் ஹாத் ஹிங்கெ<sup>3</sup>தி<sup>3</sup>  
 (ஹொராடு<sup>3</sup>)

பெ<sup>3</sup>ட்கொ:- ஸொன்னுகு மீ உன்னொஹா  
 ஸுய பு<sup>4</sup>த்<sup>3</sup>தி<sup>3</sup> மொக<sup>3</sup> ஜுண்ணாஹா - தொரெ  
 புஸ்னிகு மீ ஜவ்னி ஸங்கு<sup>3</sup>வோ  
 பொ<sup>3</sup>ட்டு ப<sup>4</sup>ந்<sup>3</sup>தி தொக ஸிங்கு<sup>3</sup>வோ  
 (ஸொன்னுகு)

பெ<sup>3</sup>ட்கி:- தே<sup>3</sup>ஸும் ராண் தொ<sup>3</sup>ங்க<sup>3</sup>ரும் - ஓள  
 தெ<sup>3</sup>ய்டா<sup>3</sup> து<sup>3</sup>ரு பி<sup>2</sup>ரி பொட<sup>3</sup>ஸு  
 வகுண்டொ திகுண்டொ  
 வடொ<sup>2</sup> ஹொயி பி<sup>2</sup>ர் த<sup>4</sup>மஸு  
 ஹவ்டெ தா<sup>4</sup>னு சுட்டு பி<sup>2</sup>ரி அவஸு  
 அம்கொ ஆத<sup>3</sup>ரொ ஜுக்கு கெரஸு  
 ஜவ்னி ஸங்கி<sup>3</sup> ... ஜவ்னி ஸங்கி

பெ<sup>3</sup>ட்கொ:- ஸங்கு<sup>3</sup>ஸு  
 உஞ்ச தா<sup>4</sup>மு ஹிப்<sup>3</sup>பி<sup>3</sup>ரா:னுஸ்தகு  
 உஸிளி பொடி<sup>3</sup> ஹுத்திரி அவஸு  
 ஹுன்னொ ஸேஸ்தெ பொ<sup>4</sup>யங் ஸிள்ளொ கரஸு  
 ஸொன்னொ ஸொக பெய்ர் பிக்கட<sup>3</sup>ஸு  
 ஒத்தி ரீ:கின் த<sup>4</sup>மஸு கா<sup>3</sup>மு ம:த்திமு து<sup>4</sup>ளஸு  
 நெத்<sup>3</sup>தி<sup>3</sup> மெனனு ஜவ்னி நெத்<sup>3</sup>தி<sup>3</sup> மெனனு

பெ<sup>3</sup>ட்கி:- ஸாபு தொ<sup>3</sup>ஸ்கர் தக தக த<sup>3</sup>மி  
 ஸாரதி ரெத்துமு ஜக<sup>3</sup>ண ஜக<sup>3</sup>ண ஜன ஜன  
 ஹொக<sup>3</sup>னு த<sup>3</sup>ட<sup>3</sup> த<sup>3</sup>ட<sup>3</sup> பொ<sup>4</sup>ன்னொ க<sup>3</sup>ட<sup>3</sup> க<sup>3</sup>ட<sup>3</sup>  
 ஹொயதி ஆங்கு<sup>3</sup> நிளவனி கொபு<sup>3</sup>டு<sup>3</sup> ஸனி  
 காயொ ஸங்கி<sup>3</sup> ... காயொ ஸங்கி<sup>3</sup>  
 களானு மெனேதி மான் ஒங்கி<sup>3</sup>



பெய்தகொ:- ஸாபு தொஸ்கர் நர்த்தன கௌ  
 ஸாரதிக ரெத்துமு ஸங்கு புனி  
 ஹொகௌமு பதிநிநி பொடி  
 ஹொயெதி ஆங்கு நிளவனி கொபடு ஸனி  
 பல்ராமு பாய் கீஷ்டு ஜவ்னி கீஷ்டு  
 அத்தொ மீ புஸ்யா

பெய்தகி:- ம்ஹு...

பெய்தகொ:- லோதும் ஈதொ கௌ அவயி ம:ளினு நா:  
 லொ:கணு ஆங்குமு தொண்சாயி பாணமு நா:  
 பூலுமு ராத் தீஸ் சுட்டு பீரயி ஒண்டு நா:  
 ஜாலமு வத்தொ போல் கரயி தோணு நா:  
 ஸங்கிவொ மாயி ஜவ்னி ஸங்கி-தூ  
 ஸங்குண ஜியதி புத்தி மிங்கி

பெய்தகி:- (யோசனெ கரி கோஸு ராஸு)

பெய்தகொ:- ஜவ்னி மீ ஸங்குயா

பெய்தகி:- (தொஸ்க ஹவ்ஸு)

பெய்தகொ:- துதுரு ரீவி தெர்னஸ்தொ சொரஸ்தொ  
 சுட்டு பீரெ பொங்குரொ ஸொக மொன்னு  
 கொவ்ரஸ்தெ  
 திர்னஸ்தெ ப்ராந்திமு தீர்வானு பிஸொ கலயி  
 தீஸுகு மிஞ்செ ப்ரேமு ஸனி அம்பொ  
 ப்ரேமு ஸனி அம்பொ

பள பள கரி தொளொ உக்கயி  
 பனி லய்னஸ்திக்காம் ஸுக்கயி  
 அஸ்கி தெங்க ஸமஸ்துக ராயி  
 அகாஸும் மெள்ளொ ளொளயி  
 சுரு சுரு கரி குரும் அவி தெரயி  
 ஸுக்கெ பானு தெக கவ்னமு ஹொயி  
 காயொ ஸங்கி ...காயொ ஸங்கி  
 களானு மெனெதி மான் ஒங்கி

பெட்கி:- (மான் ஒங்குஸு)

பெட்கொ:- பள பள கரி தொளொ உக்கயி  
பனி லய்னாஸ்திக்காம் ஸுக்கயி  
அஸ்கி தெங்க ஸமஸ்துக ரா:யி  
அகாஸும் மெள்ளொ னொளயி  
சுரு சுரு கரி சூரும் அவி தெரயி  
ஸுக்கெ பானு தெக கீவ்னமு ஹோயி  
ஹொளொ அம்பொ<sup>3</sup> தே ஹொளொ அம்பொ<sup>3</sup>-கேரி  
கெ<sup>3</sup>ளொ லம்பொ<sup>3</sup> தூ கெ<sup>3</sup>ளொ லம்பொ<sup>3</sup>



ராடு - அரசன்

லிங்கு<sup>3</sup>வோ - மாற்றுவேன்

ப்ராந்தி<sup>3</sup> - மயக்கம்

ப்ரேமு - காதல்

ஸமஸ்து - பொது

கீவ்னமு - உணவு



## செய்ம்பட்டெ நாது<sup>3</sup>

அல்லட<sup>3</sup>ய் பா<sup>3</sup>ல்யமு

அஸகரி ஜே<sup>3</sup>ரு<sup>3</sup>கய்னா

ஹவுர் பொடி<sup>3</sup> தெ<sup>3</sup>க்கத்தேளி

ஆனந்த<sup>3</sup>மு ஆனந்த<sup>3</sup>ம்

(அல்லட<sup>3</sup>ய்)

செய்ம்பட்டெ நாது<sup>3</sup> எரிங்கா<sup>3</sup>ரு கீ<sup>3</sup>து

ஜிவ்னமு உல்லாஸ<sup>3</sup> எரிள்ளகன் ஸல்லாபு

போ<sup>3</sup>ரு வாஞ்சனெ ஸெங்கொ

பொ<sup>3</sup>வி க<sup>3</sup>ளெதி<sup>3</sup> தும்கொ

ஸார்கு<sup>3</sup> ராடு துமீஸி - ஹாலி

ஸொம்பும் தெ<sup>3</sup>க்கத்தேளி ஆனந்த<sup>3</sup>மு ஆனந்த<sup>3</sup>ம்

(அல்லட<sup>3</sup>ய்)

பொள்ளொ ஹொயெ காலுமு குள்ளெ ஜாணு ஜாலமு

ஸொந்தோஷ் உரஸ் மொன்னுமு ஹிந்தொ<sup>3</sup> தெ<sup>3</sup>க்கெ குண்ணுமு

ஸானாஸ்தெ ஸனிமு

ஸங்கு<sup>3</sup>னாஸ்தெ கெ<sup>3</sup>னினு

ஜக<sup>3</sup>துமு நிள்சி ரா:னி - ஹாலி

ஸொம்பும் தெ<sup>3</sup>க்கத்தேளி ஆனந்த<sup>3</sup>மு ஆனந்த<sup>3</sup>ம்

(அல்லட<sup>3</sup>ய்)



## லாஜ் கோகவோ

ஸங்கி<sup>3</sup>வோ..... ஸங்கி<sup>3</sup>வோ

ஸாஸ்த ஸனிமு லாஜ் கோகவோ (ஸங்கி<sup>3</sup>வோ)

இன்பு ஹட்<sup>3</sup>வன்ஹா ஜாணு தி<sup>4</sup>டவ்ஹா

ஸொம்பு வத<sup>3</sup>னும் ந:ன்ன அஸினி கோகவோ (ஸங்கி<sup>3</sup>வோ)

பொன்னு ஜா<sup>3</sup>டுக் பொ<sup>3</sup>வெ பூ<sup>3</sup>லு வேலு

பொ<sup>4</sup>ய்ஞிர் லலடெஸி வஸு<sup>3</sup>னா பூ<sup>3</sup>லுன்

அகா<sup>3</sup>ஸ் ஸெந்தொ க<sup>2</sup>ளஸு அத்<sup>3</sup>த<sup>3</sup>மு சாந்து

ஆனந்து<sup>3</sup> காயவோ ஸங்கி<sup>3</sup>வோ

ஆஸெனு காயவோ ஸங்கி<sup>3</sup>வோ (ஸங்கி<sup>3</sup>வோ)

உரஸு மையும் ஹுப்<sup>3</sup>ப<sup>3</sup>ஸு அந்து<sup>3</sup>ஸு - வத<sup>3</sup>ன்

ஓடா கமலு ஜா<sup>3</sup>டொ ஸங்க<sup>3</sup>ஸு

ஹம்ஸானு சல்னி ஆவி மொதி மொண்ணி

ஹட்<sup>3</sup>வனு காயவோ ஸங்கி<sup>3</sup>வோ

அர்மொ ராஜளி ஸங்கி<sup>3</sup>வோ (ஸங்கி<sup>3</sup>வோ)



பூ<sup>3</sup>லுவேலு - பூங்கொடி

உரஸுமையும் - ஊரும்தேனில்

மொதி - முத்து

ராஜளி - ராணி (ராஜ + அளி = ராஜளி)



## ஜீவ நெத்<sup>3</sup>தி<sup>3</sup>

ஸுந்தர<sup>3</sup>ர<sup>3</sup> தொக ஹட்வி

ஸுக<sup>3</sup>மு ஹட்<sup>3</sup>வனு செட்வி

தி<sup>3</sup>ன்னு க<sup>3</sup>ம்ண்டிஸ் மீ துரெ மொன்னும் ஸம்ண்டிஸ்...  
(ஸுந்தர<sup>3</sup>ர<sup>3</sup>)

ஸிங்கா<sup>3</sup>ரு பூ<sup>3</sup>லு லானு

ஸெங்கொ ரீ: ஹொடெ வேலு

விஸிர் ரீ:ஸ் தும்கொ ஜாலு

வெடி<sup>3</sup>க்கன் அவிஸ்தெ மோலு

ஓர்ஸு ந:ன்ன ஐயா ஒய்யாளி தகரீஸ்ய்யா

ஓலொ ஸரீரு ஐயா ஊமென்னா ஆவி ஐயா மீ...  
(ஸுந்தர<sup>3</sup>ர<sup>3</sup>)

ஸுக்குனாஸ்தெ ஜீவ நெத்<sup>3</sup>தி<sup>3</sup>

ஸெக்கர் ஸோனு நா:னு மத்தி

முதுர்னாஸ்தெ ந:ன்ன மொதி

மோஹன ரூபவதி

ஓர்ஸு ந:ன்ன ஐயா ஒய்யாளி தகரீஸ்ய்யா

ஓலொ ஸரீரு ஐயா ஊமென்னா ஆவி ஐயா ...

(ஸுந்தர<sup>3</sup>ர<sup>3</sup>)



## ப்ரேமு

சொக்கட் ஹிரன் பி<sup>4</sup>ம்புமு

ஸொம்பு தே<sup>3</sup>ய் லம்பு<sup>3</sup>மு

ஹங்கார் கோககிவோ

ஸிங்கார் தீ<sup>3</sup>டே<sup>3</sup>கிவோ

தூ ஸான் அவ்னயா

து<sup>4</sup>பார் ஜான் ஹோனயா

... (சொக்கட்)

மோ:ரு ஜுண்ண ஜியெத் சொக் நாசு நீ:ன

ஹம்ஸா தூ நீ: மெனெத் மொர் ஜிவ்னம் நீ:ன

பூ<sup>2</sup>லான் ஜுண்ண ஜியெத் மது<sup>4</sup>ர வஸுனெ நீ:ன

சாந்து தூ நீ: மெனெத் மொர் ஜீவு நீ:ன

ஸீ அத்த ஏடு ஆவி மொக பொ<sup>3</sup>வ்லிகின்

ஸா க<sup>3</sup>ளஸ்தேஸி ப்ரேம் கீ<sup>3</sup>துன் க<sup>3</sup>வ்லிகின்

மொர் ராஜாளி நித்தெ தூ மிளி ரீ:டெ<sup>3</sup>வோ

(சொக்கட்)

ஹளது வத<sup>3</sup>ன் ஸியத் அந்து<sup>3</sup>ஸ் லக<sup>3</sup>ஸ் - க<sup>3</sup>வ்லொ

ஆப்பிள் பொத<sup>3</sup>ன் மயத் ஸொந்தொ மெனஸ்

நாகு மொனெ வதஸ் ரமொ ஸொகன் - லொ:வ்வொ

ஹோடு ஸனெ கீது பொள்ளொ ஸொகன்

ஸனினு ஸங்க<sup>3</sup>ய் ஸஸர் ஓடுனுஸி

ஸதினு மெய்ங்க<sup>3</sup>ய் மது<sup>4</sup>ர கீ<sup>3</sup>துமுஸி

மொர் ராஜாளி நித்தெ தூ மிளி ரீ:டெ<sup>3</sup>வோ

(சொக்கட்)

சாந்து உஜெஸ் மொதி ஸாந்தம் அவிஸ் - மொசு  
 ஸொந்தம் ஹொயி கலாகாந்தி ஹொயிஸ்  
 ஹிந்தொ<sup>3</sup> ஸொகன் ஆயுஸ் ஸெந்தொஅவஸ் - ஒளொ  
 விந்தொ<sup>3</sup> கரி நு:ரு பந்தம்: ஒவஸ்  
 மாய் மெனிதின் பொவெத் ஆஸென் பொ<sup>4</sup>ரஸ்  
 கா<sup>5</sup>ய் மெனதி ஸொம்பும் சுட்டு பி<sup>2</sup>ரஸ்  
 மொர் ராஜாளி நித்தெ தூ மிளி ரீ:டெவேரா  
 (சொக்கட்)



ஹிரன்—பொன்

ராஜாளி—(ராஜா+அளி)=ராணி

ஒவஸ்—சுமக்கிறுள்





## கோடி பூ<sup>2</sup>லு அந்தூ<sup>3</sup>ஸ்

பெ<sup>3</sup>ட்கொ:- ஸாரிஸ்தெ ஸனி அஸ்தி கோடுமீ-  
 ஸாரியொ ஸனி தொரெ போத - தீஸ்  
 கோடி பூ<sup>2</sup>லு அந்தூஸ் தெ<sup>4</sup>ரி தொ<sup>2</sup>வ்வி வத<sup>3</sup>னும்  
 கோ<sup>3</sup>ஸு ரா:ஸ்தெ ஏட் குகு (ஸாரி)

பெ<sup>3</sup>ட்கி:- ஸாரிஸ்தெ ஸனி அஸ்கி ஏடு - துமி  
 ஸாரியொ ஸனிமு ஸே ப்ரேவு - துரெ  
 அந்தூ<sup>3</sup>ஸ் மிஞ்செ ருபு ஸொம்பு மிஞ்செ வாசு  
 ஸங்க<sup>3</sup>ரேஸ் ஸஸர் ஓடு (ஸாரி)

பெ<sup>3</sup>ட்கொ:- அந்தி<sup>3</sup> தெ<sup>4</sup>த்துகு ஆனந்து<sup>3</sup> ஹோரும்  
 ஹ<sup>2</sup>வன் மெய்ங்கரேஸ் அம்ர்த்து ஸோன் கீ<sup>3</sup>தும்  
 அளியொ இஸொ தூ த<sup>4</sup>மிகினு ஜியெதி  
 அமி ஏட் ஜிவஸ்தெ கொ<sup>2</sup>ப்<sup>3</sup>பா<sup>3</sup>கு - பொ<sup>4</sup>வெ  
 ஆனந்து<sup>3</sup>ம் மிளஸ்தெ கொ<sup>2</sup>ப்<sup>3</sup>பா<sup>3</sup>கு  
 மொன்னும் உரரியொ ஸொம்பு  
 இன்பும் ஹொயெ ஸெங்கு<sup>3</sup>  
 அலக்<sup>3</sup>க<sup>3</sup> ரா:ன் முஸுனா தூ

பெ<sup>3</sup>ட்கி:- அந்தி<sup>3</sup> தெ<sup>4</sup>ருவாய் ஜாணு ஹால்  
 ஆஸெம் மெய்ங்க<sup>3</sup>ன் ஹோனா ஏட்  
 அளினு மொன்னு பூ<sup>2</sup>லு ஸொகனு  
 ஹள்ளு ஹாதும் க<sup>3</sup>ள்ளுனெ  
 ஸங்கு<sup>3</sup>ஸ் அங்கு<sup>3</sup>ன் அய்குனெ (ஸாரி)

பெ<sup>3</sup>ட்கொ:- கா<sup>3</sup>ந்தம் ஸொகனு கவ்வரெஸ் ருபு  
கள்ளி ரீ:கின் க<sup>3</sup>ளரீ:ஸி - பீ<sup>3</sup>ரு  
காய் மெனேஸ் மீ லாஸு ஹோனா  
காய் மெனேஸ் மீ லாஸு ஹோனா

பெ<sup>3</sup>ட்கி:- ர:வொ ஏட் அல்லட்<sup>3</sup> ஹோனா - லெகின்  
லயெத்தெர் ஸொட்<sup>3</sup>டி<sup>3</sup> ஜான் ஹோனா  
பொ<sup>4</sup>ரெ மொன்னு மொக நீ:ஹா  
பொ<sup>3</sup>ட்டு ப<sup>4</sup>ந்தெத் ஸொடு<sup>3</sup>ஹா  
பொ<sup>3</sup>வட்<sup>3</sup>தீ<sup>3</sup> ராக் ஹோனா

தீ<sup>3</sup>தென்:- ஸௌராஷ்ட்ரா பா<sup>4</sup>ஷாம் க<sup>3</sup>வி ஏட் - அமி  
ஸஸர்<sup>3</sup>கோடி கீ<sup>3</sup>துன் ஹொவடெ<sup>3</sup>னு - மாயி  
பா<sup>4</sup>ஷாம் மிஞ்செ ஸுக<sup>3</sup>முன் லோகு<sup>3</sup>ரு நீ: மெனிகின்  
ஸொம்புகன் தி<sup>3</sup>ன்னு க<sup>4</sup>லெனு.



## து<sup>3</sup>துரு ரீ:லி

சுக்கொ ஸொக து<sup>3</sup>துரு ரீ:லி

ஸிள்ளொ மொக தொ<sup>3</sup>ளாமு தீ<sup>3</sup>லி

ஸுக<sup>3</sup>மு தே<sup>3</sup>ஸ்தக் சுருமு த<sup>4</sup>மி ஆவி - மீ

சுட்டு பி<sup>3</sup>ரி வெடி<sup>3</sup>கு ஸவு மாயி

(சுக்கொ)

கெண்டெ<sup>3</sup> ம:ளி ஸனி எரீலி

கெளினு ஸொக அங்கிளி தீ<sup>3</sup>லி

கே<sup>3</sup>லி கெரஸ்தக் து<sup>4</sup>ங்கி<sup>3</sup>கினு ஆவி - மீ

கெ<sup>4</sup>னம்கன் ஒண்டெ தீ<sup>3</sup>டு<sup>3</sup>கு<sup>3</sup>ளு மாயி

(சுக்கொ)

ரமொ ஸொக வத்தொ கர்லி

ரதி ஸொக ந:ன்ன சல்லி

ஸதி முஸுங் க<sup>4</sup>ல்லிகினு ஆவி - மீ

ஸம்பு ஒடு ஸங்கி<sup>3</sup> க<sup>2</sup>ளு மாயி

(சுக்கொ)

ஜாலு பொ<sup>3</sup>ட்டொ கேடு<sup>3</sup>ம் பி<sup>3</sup>ல்லி

பு<sup>3</sup>லு சரம் வெனிம் க<sup>4</sup>ல்லி

பே<sup>3</sup>லு நீ:ஸ்தக் பொடி<sup>3</sup> து<sup>3</sup>ளெனு ஆவி - மீ

பொ<sup>3</sup>ல்லி ஜவு ஸொர்கு<sup>3</sup>னுகு மாயி

(சுக்கொ)

அந்தெ<sup>3</sup> து<sup>3</sup>து அந்தா<sup>3</sup>ஸ் மோ ரு

பொ<sup>3</sup>ந்தெ<sup>3</sup> மடி<sup>3</sup>ர் பொஞ்ஜி கெரு

ப<sup>3</sup>ந்தெ<sup>3</sup> பல்சொ அஸ்கி தெ<sup>3</sup>வு ஆவி - மீ

ஹிந்தொ<sup>3</sup> க<sup>3</sup>வெஸ் தொரெ ஹோரு மாயி

(சுக்கொ)



ஸம்பு ஒடு (100) நூறு ரகசியம்

ஜாலு - வலை (பள்டொ)

## புது ஸோகன்

சூபு மொக மெய்ங்கா<sup>3</sup>ரேஸ்  
மொன்னு தொக மீ தீ<sup>3</sup>ரேஸ்  
புது ஸோகன் தூ ஸேனா மீ ஸாரேஸ் (சூபு)

மொன்னும் மெல்லீஸ் மொக ஹட்<sup>3</sup>னீனி  
க<sup>3</sup>வ்லா லொவ்வாமு தெல்லெ ஸங்கீ<sup>3</sup>னி  
கொஞ்சுதொ ஸொட்<sup>3</sup>டிகின் மொரெ ஜோவன் ஆனி(சூபு)

சாந்து ஹுஜானும் ஸரஸம் கெரேங்கொ  
நெத்<sup>3</sup>தி<sup>3</sup> வனாழ நிஞ்ஜி ர:யேங்கொ  
சுக்கொ ஸிலேது சுட்டு அமி பி<sup>3</sup>ரேங்கொ .... (சூபு)

உஜிகின் ஹொடி<sup>3</sup>கின் காயி தெ<sup>3</sup>க்கேயொ  
ஹொராடு கெல்லீகின் ஒடுஸ் மெல்லேங்கொ  
ஜியெ ராத் அஸ்கி ஏ ராத் ஸோகன் அவ்னா... (சூபு)



ஒடு—ரகசியம்



## தெமாம் இன்பு ராயி

பெ<sup>3</sup>ட்கொ:- செவ்தெங்கோஹா பா<sup>4</sup>ஷொ செவ்தெ<sup>3</sup>ங்கோஹா  
ஸௌர பா<sup>4</sup>ஷொ கா<sup>3</sup>மஸ்க ஸங்கெ<sup>3</sup>ங்கோஹா  
...(செவ்)

பெ<sup>3</sup>ட்கி:- ஜுனி ஸியெதி பெ<sup>4</sup>ளி ஸொம்பு ராயி  
ஜாதி மத<sup>2</sup> பே<sup>4</sup>து நீஸ்தக் செரி ராயி  
தெமாம் இன்பு ராயி  
பெ<sup>4</sup>ளி தென்பு ராயி  
...(செவ்)

பெ<sup>3</sup>ட்கொ:- நெத்<sup>3</sup>தி<sup>3</sup> பனிம் த<sup>4</sup>மிகின் க<sup>2</sup>ளெங்கோஹா  
நெத்<sup>3</sup>தி<sup>3</sup> வளும் ப<sup>4</sup>ஷொ லிக்கெங்கோஹா

பெ<sup>3</sup>ட்கி:- ஜாடு<sup>2</sup> லானும் ஸேத்தேட் ஜயங்கோஹா  
ஜா<sup>2</sup>டும் அம்ரெ பா<sup>4</sup>ஷொ கி<sup>3</sup>ர்கெங்கோஹா

பெ<sup>3</sup>ட்கொ:- ஆ ... ... ஆ ... ... ஆ ... ...

பெ<sup>3</sup>ட்கி:- ஓ ... ... ஓ ... ... ஓ ... ... (செவ்)

பெ<sup>3</sup>ட்கொ:- அத்<sup>3</sup>த<sup>3</sup>ம் ஸொகன் க<sup>3</sup>வ்லாம் வத<sup>3</sup>ன் ஸவுயா  
ஆஸ்தகனு ஹாது கேடு<sup>3</sup>ம் கு<sup>3</sup>வ்னுயா

பெ<sup>3</sup>ட்கி:- பூ<sup>2</sup>லு ஹாரு க<sup>2</sup>ள்ளி மீ க<sup>4</sup>லுயா  
பொ<sup>3</sup>ட்டு ப<sup>4</sup>ந்தெத் ப<sup>2</sup>ல்சொ ஊமெனுயா

பெ<sup>3</sup>ட்கொ:- ஆ ... ... ஆ ... ... ஆ ... ...

பெ<sup>3</sup>ட்கி:- ஓ ... ... ஓ ... ... ஓ ... .. (செவ்)



லானு — நந்தவன் (பார்க்)



## ஸாஸ்திஸா ஜாணு

தே<sup>3</sup>வ் முல்லாம் ஜனெ ரூபம் ரீ:ஸ் ஸெங்<sup>3</sup>குவோ  
தே<sup>3</sup> கவ்லாம் க<sup>3</sup>னென் ஏடும் தீ<sup>3</sup>ஸ் ஜாந்த<sup>3</sup>வோ

தென்பு மிஞ்சி இன்புகன்

ஸொம்பும் ஸம்டி ஸெங்கு<sup>2</sup>கன்

செரி லம்பு<sup>3</sup>ம் ஜிவென் ஆவிவே... (தே<sup>3</sup>வ்)

பு<sup>4</sup>விரு வேன் ஸுக<sup>3</sup>முமென் அளி ரூபு ஸெந்தொ  
அவி ரீ:கின் மிளெனேடும் ப்ரேவ் தேறாரு ஹிந்தொ  
ஸாஸ்திஸா ஜாணு ஸரஸமு வேனு

லே பொ<sup>4</sup>ரி ஏடும் தூஸ் மோக தே<sup>3</sup>வு... (தென்பு)

அவய் ஏணு த<sup>4</sup>மி ஏடு தொரெ ஸிங்கா<sup>3</sup>ர் எரீகின்  
அவெ ஏணு த<sup>4</sup>மி ஜேட<sup>3</sup>ய் லாஸு மிஞ்சீகின்  
ஆனந்து<sup>3</sup> வேனு தே<sup>3</sup>ஸ்திஸா வாடு

ஆர்த்திக தீ<sup>3</sup>தென் ஜிவஸ்திஸா வேளு..... (தென்பு)



அளி—மங்கை

ஜாணு—இளமை

ஏணு—கலைமான்



## மொதித ஹாரமு

பெ<sup>3</sup>ட்கொ:- ர:த்த வத்தொ ஸங்கி<sup>3</sup> மிளு  
 ரதி ஸோனு எங்கா<sup>3</sup>ருமு  
 அந்தா<sup>3</sup>ஸு மிஞ்செ ஸுப்<sup>3</sup>பு<sup>3</sup> லெகுஸ்தொ  
 ஆவி தூ—ஆஹா  
 அமர்த்து ஸொகன் கீ<sup>3</sup>துன் கீ<sup>3</sup>வ்வி லெகுஸ்தொ ஆவி தூ  
 (ர:த்த)

அஸினி அஸினி அவஸ்த வேளு  
 அளினும் ராணி தூ—தொர்  
 அஸினி வெடி<sup>3</sup>க் ஸாஸ்தெ வேளு  
 மொதிசு ஹாரமு—ஆணி  
 மொதிசு ஹாரமு  
 நசிலி நசிலி சலஸ்த வேளு  
 ஹம்ஸொ ஸோனு தூ—மொர்  
 ஆஸெ தொக ஸங்கி<sup>3</sup> ஏடு  
 ஸஸரு ஒடுஸு—ஆஹா  
 ஸஸரு ஒடுஸு (ர:த்த)

பெ<sup>3</sup>ட்கி:- க<sup>3</sup>ன்னங்கோ ஆஸெ அய்யான்  
 கா<sup>3</sup>ளு மிஞ்செத் வேஸு அய்யான்  
 சார் று ரு ஜென்தீரியொ ஜவொ தெங்க<sup>3</sup>டு<sup>3</sup>ம்  
 ஜல்லஸ்தக் ஜெனலேத் ரி:யெத் தா<sup>3</sup>மு நீ: ஏடும்  
 (க<sup>3</sup>ன்னங்கோ)

பெ<sup>3</sup>ட்கொ:- அவ ககவா தூ த<sup>3</sup>க்கரீ:ஸ்தெ—கொ<sup>3</sup>ப்<sup>3</sup>பி<sup>3</sup>ம்  
 அஸினி ஜிவஸ்தக் வாடுஸ் எல்லெ  
 ஸங்கு<sup>3</sup>ஸ்ஸா க<sup>3</sup>ம்சிகின் அய்கீலிடே<sup>3</sup>—மொரெ  
 ஸமர்த்து வாடுன் ஜல்லீ ரீ:டே<sup>3</sup>  
 ஆப்ரேஷன் கர்லியொ ஹாலிமு—அம்ரெ  
 ஆனந்து<sup>3</sup> ஏட் ஹொள்ளியொ ஜிவ்னமு  
 அவககவா ... அவககவா ... அவககவா ...



அளி—மங்கை      மொதி—முத்து      ஹாரு—மாலை  
 ஹம்ஸொ—அன்னம்      ஒடு—ரகசியம்



## தூது சாந்து

மொர் ஆஸெ ப்ரேமிகு தூது சாந்து-தூ

மொ:ட்டக்கீவோ ந:ன்னகீவோ தூது சாந்து

மொர் ஆஸெ ப்ரேமிகு தூது சாந்து

ஜஃஸ்தெ சுக்கான் அஸ்கீ தூது சாந்து-தொரெ

ஸர கீளனு ஸிங்கீதி'ன்ஹா தூது சாந்து

நெக்கு பொடெ கீவ்வொ காயொ தூது சாந்து-சொக்கட்

லெக்கும் சுண்டெ ஜவ்னெ கோனு தூது சாந்து (மொர்)

பில்லொ ஸொகன் மொன்னு தூது சாந்து—ஒண்டெ

பெட்கி அவி ஹெள்ளி ஜீரிஸ் தூது சாந்து — தெல்லெ

மொய்லு பூஜுக் தூ ஜல்லய் தூது சாந்து—தே

மய்லி அனி தீடெ ஆவி தூது சாந்து (மொர்)

கெஞ்ஜி மயத் தேனா தெனெ தூது சாந்து—தெக

களானாஸ்தக் கீள்ளி அவ்டெ தூது சாந்து

தா'குன் தொக வேஸு நீ: தூது சாந்து ஏ

தா'னு தெனெ ஸங்கீரீ:ஸி தூது சாந்து (மொர்)



## ஸொம்பு காளுனுமு

பீட்கி:- ஆஸெனுமு ஒட்ஜிரித்தெ நன்ன ஓர்ஸளி  
ஹட்வினிகின் அல்லடீரீஸ் மொன்னு தெகதீ  
(ஆஸெ)

ஆஸெஹொயெ பூலுஹாரு ஹாதும் கள்ளிரீஸ்  
ஆர்த்திகன் கெளாம் கலத்தக் ராடுக் ஸீலிரீஸ்  
ஆஸெ ஹொயெ ராடு பெய்கு ஹொயெ ஹால்  
அஸிகின் அஸுனாத்தக் பாத்தொ பொந்தீரீஸ்

பீட்கொ:- ஆஸெனுமு ஒட்ஜிரேஸி நன்ன ஹொவ்டொ ஏட்  
அடீய பல்லொ ஸாந்தி கோடு ஜீ தெரீய்—ராஜி  
அடீய பல்லொ ஸாந்தி கோடு ஜீ தெரீய்  
அளிகு ஸொம்பு காளுனுமு ஆஸ்தொ தொவ்விரெய்  
ஸளிகு ருபும் ஸாத்திஸ-ஹொப் துக்கு பொந்திரெய்  
வெடிகு அஸ்கி வேனாக் சொரக தீடீய ஹால்  
வெடிக்கன் ஹொயெ ஹாலிம் வீதுர் அவ்ன ஹொய்  
(ஆஸெனுமு)



ஸு + அளி = ஓர்ஸளி - (வயது) இளமங்கை.

## கீதும் லலட்ரேஸ்

அகாஸு வீதும் சலிகின் அவஸு தூது சாந்து-தூ  
அம்ர வீதும் கொப்பொ அனத்தெ தூது சாந்து

குண்டு வதீனும் அந்துஸ் பொரிஸே தூது சாந்து-கனொ  
ஒண்டு ஸொகனு தொனானு தீய்யொ தூது சாந்து

ஸாத்த வேளு மேகும் துரஸு தூது சாந்து-மீ  
ஸா வேளு வீதும் அவஸு தூது சாந்து

தீஸும் ஸியநி ஜோதி ஸொகனு தூது சாந்து-தொக  
நெரிகின் கள்ளொ மெணிகின் லகஸு தூது சாந்து

அஸத்த வேளு மொதினு லலஸு தூது சாந்து-மொரெ  
ஹட்வன் ஏடு கீதும் லலட்ரேஸ் தூது சாந்து



# நந்தி'னி

ஸுரித் ரொவ் ஒர்ஷும் பகுல்  
தெ<sup>2</sup>ரெவ வேளும் பை<sup>4</sup> களின் ஆனந்தம்  
க<sup>3</sup>ரெவ நந்தி'னி பே<sup>2</sup>வு

தீ<sup>3</sup>ஸு ஸே ராது ஸே தி<sup>3</sup>ன்னுமு  
ருஸு ஸே ப்ரேவு ஸே குண்ணுமு  
வஸு<sup>2</sup>னெ ஸே கா<sup>4</sup>னு ஸே பூலுமு  
ஹு<sup>2</sup>ன்னெ ஸே எள்ளெளா ஸே ஸனிமு  
கு<sup>3</sup>ள்ளெ ஸே தொடுகு ஸே பொள்ளாமு  
ஸெள்ளெ ஸே தெ<sup>3</sup>ஸினி ஸே ஒஸ்துமு

சொக்கட்யொ ஹீனூயொ

அஸ்கு தெமாமு ர:தொ

சொக்கட் விஷபமுன் ஒண்டேஸ் பொ<sup>4</sup>வ்ரிவி

ம:டா<sup>3</sup> ம:டா<sup>3</sup>கு

அவ்ரெ கே<sup>4</sup>ர் வெக்கிலி

அவ்லேத் ரீ:ரெஸி ஸுரிது

ஒண்டவாள் தீ<sup>3</sup>வாள் ஸுட்டி:ர:வாய்

ஸுரிதுக் மெள்ளொ ஹந்தா<sup>4</sup>ர் ஜக<sup>3</sup>ரேஸ்

க்<sup>4</sup>ராண் தெ<sup>4</sup>ரேஸ்

ப<sup>2</sup>ராதுகு ஜ்வஞ்சிலி அவெஸி

ஜுகு விஷயமுன் நிம்பி<sup>3</sup>னி ஹொயி

ஸுரித்-ஆட் ஒர்ஷு லெந்து அவ்ரெஸி

அந்தாஸ்க அண்கக அர்த்துக

லிக்<sup>3</sup>கி<sup>3</sup>னின் ரீ:யவெஸி

அத்தொ நொவ் ஓர்ஷும்  
 பகுல் தொவ்ரிய வேள்  
 ஏவ்வைபவ்வ சலரேளி

ஏ ஓர்ஷு வைபவமு அக்ராஸனம் வஹிஞ்சரிய  
 ஸ்ரீமான் B. V. கோவிந்தராஜ் ஆர்யானு  
 வைபவமு ஸொம்மர் ரீ: சல்த கரி தேரிய  
 ஸ்ரீமான் R. P. சுந்தரகோபால் ஆர்யானு  
 ஸுரித் பொதிம் லிக்குன்னினுக் ஜேமு தேன்  
 ஸ்ரீமதி கமலினிராஜ்னு

ஏ வைபவமு மிளிரிய மொட்டானு  
 மாய் பாபுனு, பைனு, பெய்னனு  
 அங்குன் ஸ்டுடுனு, அஸ்கி தெங்க  
 அபுல் மொன் பொரெ

நமஸ்கார் களள்ளரேஸி.

நொவ் ஓர்ஷும் பகுல் தொவ்ரிய  
 ஸுரித் ஜொவனு  
 மீ நொவ்வக தோக் ஸாரியொ,  
 ஸௌராஷ்ட்ர ஜூடிம்  
 அம்ர சரித்ரு கெனின்  
 அம்ர மஹான்னு ஸங்கீர்த்தனுன்  
 சாலுக்கீதுன், நெலுங்கு கீதுன், லாலீகீதுன்,  
 தீரு கீதுன், தீரு கெனின்  
 பாரத தேஸு கீதுன், தேஸு கெனின்  
 ஸுரிதும் தெனொ மெனி  
 நொவ் ஓர்ஷும் பகுல் தொவ்ரிய  
 ஸுரித் ஜொவனு  
 மீ ஏஸி தோக் ஸாரியொ.

ஏ பொதி ஒத்<sup>3</sup>தி<sup>3</sup>னுன்

மாத்ருபா<sup>4</sup>ஷா நாடக விர்த்தி கர்த்தா

ஸ்ரீமான் ஒய்து<sup>3</sup>ன் நீலாராவுனு

தேர் ஒர்ஷு தொ<sup>2</sup>கன்

ஸௌராஷ்ட்ர பா<sup>4</sup>ஷா லலித<sup>3</sup>முன்

ஜனுல்னுக் களட்ராஸ்.

தி<sup>3</sup>வ்னீஸ் ஒர்ஷு தொ<sup>2</sup>கன்

ஜுகு ஹாஸ்ய நட்கமுன்

ஜனுல்னுக் ஸாஸ்திஸ தீ<sup>3</sup>ராஸ்.

கெ<sup>2</sup>னின் லிக்<sup>2</sup>கி<sup>3</sup>ராஸ், கீ<sup>3</sup>துன் லிக்<sup>2</sup>கி<sup>3</sup>ராஸ்,

ஸௌராஷ்ட்ர ஜுடிம் லிக்<sup>2</sup>கு<sup>3</sup>னாருகு

உத்சாகு தீ<sup>3</sup>ராஸ், தீ<sup>3</sup> அவராஸ்.

அகா<sup>3</sup>ஸும் ஸுரித் ஒண்டேஸ்

தே ஸொக

ஸௌராஷ்ட்ர ஜுடிம் “ஹாராட்<sup>3</sup>வனொ” மெனன்

வீடியோ லோஸு தெ<sup>4</sup>ரி

பா<sup>4</sup>ரதும் ப<sup>4</sup>ராட் அனெ

பை<sup>2</sup>லொ மெனிக் ஸ்ரீமான் நீலாராவுனு.

எங்க தீ<sup>4</sup>ர் ஹொயெ பிரயத்தனும்

“நொவ்ரொ கோன்” மெனன்

தி<sup>3</sup>வ்வொ வீடியோ லோஸு தெ<sup>4</sup>ரி

ப<sup>4</sup>ராட் அனன் ஜாஸுன்

எனு லிக்<sup>2</sup>கெ<sup>2</sup> தீ<sup>3</sup> கீ<sup>3</sup>த்

விநாய் ஹொரு கீ<sup>3</sup>த்தின், ஸுப்<sup>4</sup>ரமண்யன் ஹொரு கீ<sup>3</sup>து

மதுரோ நகலு மிட்டொ  
 விநாய் தெனரோ  
 ஸிவராத்திரி வைபவவு வேள்  
 ராஜாங்கு பவதுன்னு  
 “சீர்காழி கோவிந்தராஜன்” ஆர்யானு கவி  
 அம்ரெ ஸௌராஷ்ட்ர ஸமுஹுக்கு  
 உன்னதி சொச்சிராஸ்.  
 ஏ வைபவமுக்கு மொக  
 கவிதொ வசஸ்தக்  
 வாட் கவி தியெ  
 ஸுரித் ஒத்திதுன்  
 ஸ்ரீமான் ஒய்துன் நீலாராவுனுக்கு  
 நந்தரேஸ் ! நந்தரேஸ் !!  
 அகாஸ் ஹோருக்கு நந்தரேஸி !!!  
 வந்தினு.



நந்தினி—வாழ்த்து  
 பேவ—மடல்  
 தோக்—எதிர்  
 பொதி—நூல் (புஸ்தகம்)  
 ஒத்திது—ஆசிரியர்  
 ஜுடி—மொழி  
 உன்னதி—பெருமை





# ஸுந்தூ<sup>3</sup>ரு நின்னெ

(கடல் ஆழம்)

தொ<sup>3</sup>ளொ தொப்பல் கர்ளி  
தீ<sup>3</sup> பொ<sup>3</sup>ட்டு தொ<sup>3</sup>ளாம் பனிமு  
குருனு து<sup>4</sup>வஸ்தக் ஸிக்கிரியாஸி

ஹன்னுஸ்தகு அம்கொ ஸொட்னஸ்தகு  
ஹாத் போ<sup>4</sup>ரு ஹிருத<sup>3</sup>யமு கொபடு<sup>3</sup>னு  
மொண்ணி ஸொக ப<sup>4</sup>ந்தில் ரி:யாஸி

த<sup>3</sup>ய தெ<sup>3</sup>க்கனு ஹோனா—பெட்கினுகு  
த<sup>3</sup>ய தெ<sup>3</sup>க்கனு ஹோனா  
ர:க்கி ரீ:கின் மொன்னு கட<sup>2</sup>னு  
ஸெக்கி ஸீகின் விக்கு பெவட<sup>2</sup>னு

(த<sup>3</sup>ய)

எர்குட் தெங்குட் த<sup>4</sup>மரிய நெளி ஸொகனு  
எங்க ஹட்<sup>3</sup>வனு உஸுளயி தெக ஸொகனு  
ஸுந்தூ<sup>3</sup>ரு நின்னெ களள்ளிய பு<sup>4</sup>த்<sup>3</sup>தி<sup>3</sup>மானு  
ஸுந்த<sup>3</sup>ரி மொன்னு நின்னெ ஜனன் முஸனிவேனு

(த<sup>3</sup>ய)

எங்க போடும் உஜாஸ்தனு மெனிசு<sup>3</sup>ஸி  
எங்க ஸொரிவும் நஜ்ஜாஸ்தெனு மெனுசு<sup>3</sup>ஸி  
எங்க குர்ச்சி யோசனெ கரி ஸங்க<sup>3</sup>ஸ்தெங்க  
எகரத்தி<sup>3</sup>ம் ஜென்ரானி எனு ஒண்டெ தெங்க

(த<sup>3</sup>ய)



நின்னெ—ஆழம்  
ஸுந்த<sup>3</sup>ரி—அழகி

## ஸாது<sup>3</sup> பெ<sup>3</sup>ட்கின்

கனொ தெ<sup>3</sup>ய்டா<sup>3</sup>ம் மொன்னு ப<sup>4</sup>ந்தி<sup>3</sup>  
 கா<sup>2</sup>ரு விக்கும் தொ<sup>3</sup>னொ ஸந்தி<sup>3</sup>  
 லெ:க்கொ நீ:ஸ்தெ சோர் போ<sup>3</sup>லு  
 கத்தொ ஸொக ஜீப் தொ<sup>3</sup>வி  
 மரய ருபு ஸிங்கா<sup>3</sup>ரு கரி  
 மாய் மாலு ஹாதும் பொ<sup>3</sup>ரி  
 யோக்<sup>3</sup>கு<sup>3</sup>டு மெனி ஓள தெங்கொ-லோகு  
 யோசனெ நீ:ஸ்தகு பொள்க<sup>3</sup>டெ<sup>3</sup>ஸ் தெங்கொ

அஸ்கி தெங்கொ ஸேஸ்தெ தீ<sup>3</sup> தொ<sup>3</sup>னொ  
 ஆஸே ப்ரேமுகு ஸேஸ்தெ சார் தொ<sup>3</sup>னொ  
 அளினு பெய்த்து தெ<sup>4</sup>ல்வி ஹிண்ட<sup>3</sup>ஸ்தெகொ  
 அஸ்கொ தொ<sup>3</sup>னொ நீ: கானு நீ:

(அஸ்கி)

தெ<sup>4</sup>ருமுனுகு து<sup>3</sup>ஸ்டுடு<sup>3</sup>ன்கன்  
 து<sup>4</sup>ங்கி<sup>3</sup> நசிலி ஹிண்ட<sup>3</sup>னு  
 நித்தொ வாடுமு சல்லனு  
 ர:க்தொ தே<sup>3</sup>வுகு தெ<sup>3</sup>ல்லனு  
 ஸாது<sup>3</sup>க ஹொடெ<sup>3</sup> பெ<sup>3</sup>ட்கின்—எல்லெ  
 ஸாத் தோ<sup>2</sup>ருகு எங்க ஜல்லனு

(அஸ்கி)

அஸ்கி தெனு ஒண்டேஸ் மெனன்  
 அலங்கா<sup>3</sup>ரும் ஸாமதி ஸங்க<sup>3</sup>ன்  
 து<sup>3</sup>து தீஸ்தெக பிஸி மெனன்  
 து<sup>3</sup>ஸ்ர தெக மாய் மெனன்  
 ப்ரேமு பெ<sup>4</sup>ளி ஸெத்து மெனன்  
 பதிவர்த்தாகு மோலு புஸன் - எல்லெ  
 தொ<sup>3</sup>னொ ஜ<sup>3</sup>ய்வி ஜிவரியெ மெனிகு சல்லினிம்  
 தொ<sup>3</sup>ஸ்கர் விஸ்தவ் தொ<sup>3</sup>வ லெங்கு<sup>3</sup> ஜல்லனுன்

(அஸ்கி)



கா<sup>2</sup>ரு—கடும்(மை)

அளி—மங்கை

ப்ரேமு—காதல்

## ஓராத் அவயி

ர:க்த ஒண்டெதி ப்ராத் அவயி - தெந்துஸ்

ஸுத் தி மொன்னு ஓராத் அவயி

ஷாநதி ஒண்டெதி ஹுப் பி அவயி - சொட் டொ

ஸங்கிளின் தெமொ அப் பி மொரயி (ர:க்த)

காலு ஜனிகின் பொவஸ்த குடாகு

காலுஞ்சொ ப்ந்தெதி ஹிப் பி ர:வட்டு

லொ:கனு துக்கி பாரு தொவெதி

லெ:க்கனு பொவயி தொப்பட்டு (ர:க்த)

ஹிங்கு வஸுனா ப்ந்தனு முஸனா

ஹோங்கு நீஸ்தகு ஜிவனு முஸனா

ஸெத்துகு ஜக்தும் லம்பும் கொன்னீஸ்

ஸதிகரி பொல்லமு ஜக்தஸ்தரு முஸனா (ர:க்த)

தெருமு மொன்னுமு ராகு அவெதி

தேவுன் அஸ்கி தெக்கி தக்கயி

உடாவு தெளிவு கவாடு ஹுடெதி

உஜுவாவ் அந்துக்கு தொளொ அவயி (ர:க்த)



ஷாநதி—பொறுமை

ஓராத்—ஊர்வலம்

அந்து—குருட்டு

## நீதி தேவஸே

அற்புது<sup>3</sup> ஸியெஸி மத்திமு—ஏ  
அங்கு<sup>3</sup>னு ஸே தொ<sup>3</sup>ளா ம:த்<sup>3</sup>தி<sup>3</sup>மு—மீ

(அற்புது<sup>3</sup>)

தா<sup>4</sup>கு நீஸ்தெ<sup>3</sup> மொன்னுமு—ரா:த்த  
தா<sup>2</sup>மு தி<sup>3</sup>யெ கு<sup>3</sup>ண்ணுமு

(அற்புது<sup>3</sup>)

ஹிந்தி<sup>3</sup>ளஸு ஸுந்தா<sup>3</sup>ரு தீ<sup>3</sup>ன் போகுமு—தே  
ஸந்து<sup>3</sup>லஸு அபுல்மானு ஜனல் போகுமு  
ஜரி அவி ஜக<sup>3</sup>து<sup>3</sup> ஸரிர் து<sup>4</sup>வடஸு  
ஜாடு பூ<sup>3</sup>லு பொள்ளொ லலி பொடஸு

(அற்புது<sup>3</sup>)

தெய்<sup>3</sup>டா<sup>3</sup>னு பொ<sup>2</sup>டிகின் ஸிலானு கர்ராஸ்—மொன்னு  
தெ<sup>3</sup>ஸஸ்திஸா ஸிங்கா<sup>3</sup>ர் குஷானு தெ<sup>3</sup>ர்ராஸ்  
க<sup>3</sup>வஸ்தெ கொகிலுஸே நசஸ்தெ மோ:ரு ஸே  
ஜிவஸ்தெ ஜனல்னு ஜொவள் நீதி தே<sup>3</sup>வஸே

(அற்புது<sup>3</sup>)



ஜரி—(மலை)அருவி  
அபுல்மானு—தன்மானம்



## கெ<sup>4</sup>டி<sup>3</sup> நுதி

அவன் து<sup>3</sup>ஸ்டு<sup>3</sup> பளொ தெ<sup>3</sup>க்கி  
தேறம் தெட்டி ஜெ<sup>2</sup>டா ரேம் துரன்  
நுத்<sup>3</sup>தி<sup>3</sup>கு ஜெனாஸ் தெனு ஜீவோ

மொன் தொ<sup>2</sup>வெ ஜீபு அம்பு<sup>3</sup>லாகு  
வாட் ஸங்கி<sup>3</sup> த<sup>4</sup>னுபா<sup>3</sup>னு தி<sup>3</sup>யெ  
ஸௌராஷ்ட்ர அனினு ஜீ வோ

ரெத் தி<sup>2</sup>ங்கி<sup>3</sup> யுத்<sup>3</sup>து<sup>3</sup> க்ளலி  
ரெகது<sup>3</sup>மு ஆங்கு<sup>3</sup> துவ்வி  
ஸெத்து கபடெ ஹிருத<sup>3</sup>யு ஜீவோ

கெ<sup>4</sup>டி நுதி க்ள்ளியெ  
தி<sup>4</sup>ட<sup>3</sup>வ் கா<sup>2</sup>ந்து தொ<sup>2</sup>வ்ளியெ  
கார்ய தீ<sup>4</sup>ரு வம்ஸு ஜீவோ



ரேம்—இடம்  
நுத்<sup>3</sup>தி<sup>3</sup>—போர் வீரன்  
அளி—மங்கை  
ஜீவோ—வாழ்க  
நுதி—புகழ்



# மெனிகு ஜெலுமு

ஸேவோ கரஸ்த மொன்னு ரியதி ஹன்னவு ராஸ்தெனி:  
ஹன்னவு ஹாத்தோ<sup>4</sup>ரு ரியதி ஸேவோ கரஸ்த மொன்னு  
ராஸ்தெனி:

மொன்னு ஹன்னவு தி<sup>3</sup>ய்யொ ரியதி  
கு<sup>3</sup>ண்ணு ஹொயெ கு<sup>3</sup>ம்பு அப்<sup>3</sup>பிஸ்தெனி:

உஜஸ்த டேளு ஹொதெ கு<sup>3</sup>ண்ணு  
ஒதி<sup>3</sup> ஒதி<sup>3</sup>கு ஜேட<sup>3</sup>ரேஸ்—அஸ்கி  
ராஸ்த வேளு ஜியெ கு<sup>3</sup>ண்ணு  
ஜாஸ்த வேளு அவ்<sup>3</sup>ட<sup>3</sup>ரேஸ் (உஜஸ்த)

பொ<sup>3</sup>வஸ்த பக்ஷின் பொள்ளா ஜா<sup>2</sup>டும்  
பொ<sup>4</sup>ரி அவிகின் ராஸுன்—ஹன்னவு  
பெய்த்து தெ<sup>4</sup>ரிகின் கு<sup>3</sup>ம்பு ஒண்டெ  
பெத்தெ பெத்தெ கெரன் ஸாஸுன் (உஜஸ்த)

உஞ்ச பர்வத<sup>3</sup>மு உரஸ்த ஜரி  
ஒண்டேஸ் வாடுமு அவரேஸி—லம்பு<sup>3</sup>ம்  
ஒண்டேஸ்கன் நீஸ்தெ மெனிகு ஜெலுமு  
உஞ்ச கா<sup>2</sup>லு ஹொவ்<sup>3</sup>ட<sup>3</sup>ரேஸி (உஜஸ்த)




பர்வத<sup>3</sup>—மலை

ஜரி—(மலை) அருவி



—முஸெஸ்—



கஸின் ஆனந்தம்

ர:வி:

கஸின் ஆனந்தம்

7, ஜே. ஜே. ரோடு,

சேர்மன் முத்துராமய்யர் ரோடு,

மதுரை - 625 009.